


居来集

申

内閣文庫			
番號	漢	17035	
冊數	12 (9)		
函號	集	29	3





居來先生集卷之四十一

銅梁張佳胤肖甫著

墓誌銘六首

亡友邢良登先生墓誌銘

嗟乎吾友良登死矣而墓非余孰誌之往良登屬續時呼伯子如龍仲子如鶴自指其目曰兒欲吾地下瞑何如得張肖甫誌吾墓也二子既卜地逢其吉以襄事適余撫吳之明年二子械友人胡與學狀且泣血稽首奉書曰惟先君以

交驩中丞而先君汲汲焉瞑目是圖卽諸孤不
肖柰何先君之遺命余持書狀愴然自失嗟乎
良登良登吾誌之矣誌曰公諱第字良登考室
巴字水之上學者稱字濱先生先本楚麻城人
有遠祖子隆徙銅梁籍焉七傳生處士邦儒公
父也醇厚有陰德以長者聞里中受室張氏先
不宐子禱於神一夕夢吞日有聲而生公公幼
警慧目眇眇若營四海舉履雍重無疾趨詞旨
醞籍間發調詭津津近於雅六歲就外傳授尚

書已而從鄧博士又授周易日誦數千言初屬
文卽中矩會御史朱廷立行部試其文奇之補
邑弟子員時年齒舞象矣初鄧博士下帷橫經
陳說大指諸弟子唯唯聽獨公多發難常至絀
其師說一日鄧博士目攝公曰子休矣無用吾
為也處士公乃具臍脯以事李恭懿先生先生
以經學傾國中得公呼為小友時御史冉崇禮
大闢館舍拔蜀士尤者若干人游息其中延遂
寧楊編脩名主其教而余與公與焉公為文敏

妙如出夙構無所勦襲好工人之忽易人之難
每試人人自矜重及公文出而羣言廢矣公大
父故高賢有巨產北之郭處士公又孤弱為從
昆弟齟齬至盡乃僦白御史而廬焉公既數困
有司家徒四壁立會處士公疾革公侍湯藥以
身禱竟不起公治葬具一一克致大誼公早失
怙而獨當戶母與庶母俱白髮堂上庶母有丈
夫子三人女弟二人衣食率皆倚辦公客有為
公謀者曰孰與異居便公曰吾母稱未亡人而

與庶母相依為命即異之而母子惟有填溝壑
地耳吾他日泉下遊何以見先君哉自是養庶
母如其母弟姊各家室之而教其弟節成秀才
矣蓋公孝友其天性非應舉不遠遊日閉戶手
一編課諸子業甚力因而國中子弟多從之稍
顯者今貴陽李副使良臣出其門云夫公既以
筆耕而家稍稍起公廩矣子與弟復廩計歲入
縣官粟幾得五鐘食人可當三上農乃公以其
半付當墟者或飲客所輒先具殺蒸實爵進母

墓誌銘
而後往不則扶母南嚮坐庶母東南嚮坐公西
嚮諸弟東嚮諸子北嚮列蔬果無加豆取當壚
所釀者沾沾各及量公時時學菜子舞諸弟子
執壺擊節油然孝弟之風日為常矣母既終其
天年未及塋妖寇陷城焚屠甚慘人人亡命山
谷間公與子如龍抱樞泣諸賊瞑目露刃繞樞
三匝嗟嘆久之且號其黨勿犯邗孝子云公又
工古文詞筆畫得帖意一畝之宮奇石異卉蘿
徑宛轉架上琴書壁上字畫而襟度瀟遠耻卑

卑之習即不贍於俯仰必有道者周之而受亦
固有之非其人則腐鼠糞土視之矣邑令覃某
者以沒入田數百畝予公公固辭自後邑豪被
逮者習知有司雅重公徃徃裝齎求公居間一
無所應會 莊皇帝踐祚召舉天下文學子如
龍應召徃故事有司例得箕歛民錢為贖公毅
然卻之嗚呼若公者非豪傑士耶余與公貧賤
交也高論崢嶸性頗相類丙寅余省太恭人里
中見公一意杯酌至棄去穀食數以斷飲語諷

墓誌銘
卷之四十一
四
之公曰君故吾酒人安得作此言藉令頽然而
逝其樂豈南面王可望也嗟乎良登達者吾又
何能以死生為公幸不幸哉遂銘曰 寧儋石
乎無葳必致腴於甘毳之養寧稱給也君子必
不屑以苞苴之恥蓬蒿焉而方丈為第奚羨乎
高明之麗春秋焉而五十有二已結為無涯之
智約諸身以施於後人厚其積以大於爾宅古
栢之陽厥有玄堂既彭既良永視此銘章 公
生正德庚辰四月二十三日卒隆慶辛未九月

十三日享年五十二歲娶陳氏男五如龍太學
生娶李氏如鶴增廣生員娶張氏繼游氏如鳳
生員娶陶氏如麒娶嚴氏如鵬聘張氏一女適
生員張弘謨孫男二文錫聘張氏貞錫尚幼以
辛未年十二月二十日葬城西古栢山之麓
至今始誌銘其墓

廸功即直隸南樂縣縣丞鶴池李公暨配
張氏合葬墓誌銘

今世人業儒者則絀法家豈以操三尺好文致

而兢刀錐之末卒無與於君子長者之道耶迺
有法名而儒行世固未嘗無人則余中表親鶴
池李公是也公諱言字用行仕至直隸南樂縣
縣丞人始稱廸功云公世為里中右族生可數
歲家道益旁落父母又衰病不能計衣食遂以
家政委公公時方舞象年也壬午 詔選郡邑
良家子堪掾舉者公應 詔往給事雲陽縣至
戊子大饑人相食公父母竝亡於疫公與其弟
諸生齊斃斃在疾會監司議賑貸公乃得殯二

人而活八口矣辛卯服除入為果州功曹文無
害再功曹渝州又無害公嘗從太守富公好禮
者舟次蕭門雷雨風濤舟幾覆餘皆號誼為自
全計公獨從容取衣冠加富公而自奉印章從
旁慰勞曰今日風波患平生無忠義耳即有不
測言豈能須臾離使君耶已而舟竟無恙富公
由是大竒之凡郡諸曹事公無不與自此家大
振又念仲齊季彥貧弱乃斥撥附郭上腴授之
而為季入貲得掾舉今仕至倉大使矣戊戌再

考滿之留都掾史大帥魏國府中日治爰書有
名會 殿工成受賞暇則取法家言讀之一字
千過無間寒暑晝夜試果高第授正八品庚戌
謁選除二南樂司馬是年虜闌入薊門畿以南
徵馬急於烽公依期完俵而中丞艾公淳才公
使督真保二郡糧餉無缺諸臺獎者非一歷三
載公堅意請老兵憲茅公坤知公不可留乃檄
有司給文致仕詞極褒美歸林下允二十二年
而卒公配張氏世為里中著姓自笄而歸公屬

也公孤貧乃甘荼茹毒力夕以佐晝鮮出以償
入處宗族妯娌未嘗有機心有遽色迪功公故
性急而好表暴孺人一以柔順承之迪功公嘗
嬖婢最後納寵姬屬以家政孺人絕無妬忌其
慈惠類如此孺人先公卒二年而殯未有銘按
狀公先世楚人始祖諱仕隆生某某公生於弘
治辛酉八月二十四日卒於萬曆丙子六月十
二日得年七十有四孺人生弘治甲子四月十
二日卒於萬曆乙亥正月二十六日得年七十

墓誌銘
有一側室陳氏子男四女二男孫七某某以丁
丑八月二十二日塋西山之陽而孺人祔焉嗚
呼迪功公名法而俠者流也平生挾盛氣而中
富鱗甲其酬一飯而報睚眦者未嘗不盡至白
手奉三尺起家幾於利矣則又推讓仲季不私
一錢以至內外之親待公婚嫁而舉火者若干
人此其故何哉以此孝友之聲震動閭里有司
先後表頽其門公嘗往來大江兩溺矣而卒若
有人以傳諸岸者何謂作善無報耶然使內無

女貞則長舌者厲之階也即公欲法名儒行以
脩君子長者之道孰成之哉是可以誌而銘矣
銘曰 家疇振之俾勿替內疇相之業迺濟其
壽比肩七十餘年匪人也天嚮藥銜辛以貽子
孫匪天也人

舒配李氏墓誌銘

李氏者邑生員舒君元錫配也元錫母全夫人
與余先世稱戚屬余少乳於夫人長與元錫共
筆硯故余嫂事李焉余自免先君喪宦遊繼貶

梁晉間忽忽六稔矣邇家僮來自河中得元錫書竝緘李君所為女弟狀不遠數千里屬銘於余始潛然駭曰嫂胡亡哉嫂胡亡哉銘何忍辭按李為阿迷州守李大夫人長女初舉時將赴溺大夫聞啼聲異之遂得免稍長即秀慧口授孝經內則諸書輒不忘俱了大旨尤勤織績女紅嗜聽古今雍泚之行大夫嘉乃穎順欲命偕諸昆弟工字學李曰古人以有善垂誠即能書如衛夫人蔡文姬薛校書輩終德不勝材藝耳大

夫咲而奇之人亦奇大夫有賢媛在壺闔中矣指揮使義泉舒公仲子某即元錫君幼負器識將為擇配以告憲副翁翁曰此兒吾家千里駒非李氏女莫與耦也遂筮賓通好二姓克諧及李于歸也元錫甫列弟子員方揮使公以貨業甲視一邑李懼元錫習移紈綺不操澹約數陳白屋之士由是元錫奮厲經術輒試不落人下李性恭亮慈惠每雞鳴必纓笄總紳候舅姑所至其舉履莊厚薦崇儉雅籌畫內政婢無敢欺

善御媵侍撫育其子人不知為側室所出尤潔
備中饋凡祭祀賓客滌滄必躬每膳飲大父母
及舅姑必甘之丙午歲義泉公疾革時元錫應
舉成都李侍嘗湯藥禱祝備至內外聞之未嘗
不稱為賢孝婦云曾有市兒王某者因負貸索
之會病死元錫謂當置之何與於我也李曰君
門閥閱素持清重市井厮卒多習無賴生且負
信死寧顧義恐少選以無禮相加空閉戶以避
兇悍果如其言遂得不侮元錫少多疾俗傳謂

空別寄父母庇之乃鞠隣人熊大賓後大賓亡
妻寒寡無倚李白元錫迎於家奉如姑禮及卒
哀殯備至其天性明懿和厚類如此一日室後
石墮林栢枯折數本李曰物得氣先主人將去
然木石陰象我其當之未幾果病作冉冉就薦
與元錫訣曰天數自在不空過苦所不瞑目者
始年桑榆未終甘旨奉君箕箒未遂借老遺此
諸兒未覲顯揚君空善養親善教子善保身已
矣元錫感泣誓不再娶李乃溷沐盥櫛以簪珥

墓誌銘
分貽諸兒必先及側室子截髮呼執長子佑曾
手繫之曰見髮即見汝母惟是苦學自立勿替
家聲言訖而逝全夫人大號曰天奪我孝婦一
哭絕倒無問親疎少長聞者切肝嗚呼痛哉李
生嘉靖癸未十二月廿三日卒於壬戌十月十
三日年三十九歲子四長佑曾生員娶安居典
膳黃正色女次仁曾初聘生員邢第季女早殤
今聘生員譚思季女俱李出次似曾聘郭大德
長女次伉曾聘生員蘇萬邦季女俱側室李氏

出卜十月十四日塋於飛鳳山之原嗚呼風微
姆教婉婉凌遲李本發秀士族配德世家乃能
循執陰教羽儀女士抗仁於孟母比約於少君
誠古人所謂禮極中闡義殊月室者矣遂為銘
曰 坤靈燁燁涪江鄉芙蓉秀挿盧昆傍休風
鼓扇扶精光李氏生也材且良六行四德恢天
常軼古範今挹清芳纍纍者丘鳳山陽楸梧灑
露凌穹蒼千秋日月垂幽堂於昭彤管名無疆

處士全前溪墓誌銘

嘉靖戊午四月十九日處士全公卒於家九月
某日葬宅後崗姪某泣以銘請謂余雅知處士
者處士姓全氏名寅字時暘銅梁人也少甫發
蒙識大較即不屑經生事銳意陶朱力間之術
既長容度魁岸脩髯大面身八尺餘善心計與
時逐故起家鉅萬財雄於銅然好施與亡問親
識窘不能事事者處士資之而不責於人邑治
東北有渡名斜灘廣深不可以梁有司舊編夫
船各一出民財力乃船院渡者衆使人商旅苦

之處士捐金數斤粟約千石就上游伐石為橋
工制甚巨往來稱便民差遂省州牧徐公瀾行
部異之題橋曰全德邑學文廟廊廡垣門圮泐
既久相繼執政者類弗加輯處士曰學校賢材
所自出聖人之靈安於斯與其崇飾梵宇丹宮
不猶愈乎捐資新之厥廢炳如邑名宦鄉哲代
有作者舊無祠祀處士白之有司請文廟左隙
地剏二祠遣閩進士彭公謹左遷州倅來署邑
事表其績報之臺司各移檄獎異仍命有司迎

勸如儀扁其門曰義士邑咸稱全義士云全族
蕃甚悉屢居故多少年不易東處士素方直內
無城府僉以族長立處士處士一遵皇祖之訓
布條教約之有婚喪疾難貧不能舉者量族之
饒裕以次相助處士助居十七不法者治之告
諸宗廟無煩有司故族之大小斬然循於理罔
不處士是服邑稱家令之齊處士其首也處士
性率木有以幻異給處士無不售其說良以天
性誠薦不逆人如此蓋即處士所行一合於道

使多學明理處士菴有議哉余今年上巳遊香
爐峯處士繼至是夕同宿頂上謂余曰此峯銅
之靈秀堪輿家皆言可建石塔飛閣諸生當有
大魁天下者宜於絕頂構飛閣以瑞黌校雖其
理涉冥幻處士拳拳崇儒之意不可湮也是月
買地鳩工廠材既備期盡償所願而今已矣悲
夫悲夫處士生弘治甲寅年十月十四日得年
六十有五按處士家譜先係錢塘人後徙魯郡
東阿有六世祖諱某者仕元累官禮部尚書生

剛授中書省宣使洪武間起任銅梁知縣在任
六載民深德之邑之官師血食者自銅梁公始
以考績赴闕道卒歸塋於邑遂占籍東平里家
焉全氏始為銅梁人也銅梁公生某某生處士
娶某氏男某出繼處士而殤女適某以姪承胤
嗚呼天之報處士顧如是耶銘曰 有磊磊者
而寧謂弗顯有振振者而寧謂弗遠豹之革人
之名歿而不朽其聲彭彭巍巍斯纍斯千載乎碩
人之隧

周鎮平府奉國將軍崑崙公墓誌銘

代蔡白石作

周鎮平府大奉國將軍崑崙公卒之明年長子
睦樛列奉國公年表一卷來請余銘謝不敢銘
及展表先是吳郡大司寇吳公山巡撫河南時
疏奉國公至孝今余撫茲地生知奉國公宗老
比其歿也遂不得以不銘為辭按公諱安河字
應清又號崑崙山人 高皇帝生周定王公之
六世祖也定王生鎮平恭靖王恭靖王生七鎮
國將軍子圻鎮國生三輔國將軍同鎡輔國配

賈夫人生公公生之辰會鎮國勅門梁人語曰
歲德著雍嶽靈迺降閭氣充哉螿螿者蝨至辟
試所欲左手抱周易右手拍邊豆有以餅果戲
器逢之雖百試不與易三歲後俊慧嶄嶄日異
舉履即如長者授孝經論語小學不但疊疊能
誦稍長就訓外傳益縱學無不觀以例封歲祿
六百石貴矣公不以貴自溺絕狗馬聲樂務省
躬考禮刑于彝倫賈夫人病公為嘗便候治禱
祠求代不交睫解帶者數月一日夫人思食野

禽公購索遍城邑聞家有畜者輒往泣下求之
無不當夫人意故夫人數瀕危旋數霍然已越
二年夫人竟不起公痛毀骨立終三年蔬食飲
水足跡不及私室既免喪事輔國益孝輔國好
讀書賓客勅斷家事勿相關悉以付公公上承
父志下綜庭政井井惟緒輔國性玄澹不喜遠
遊公治池亭邸第歲時帥子弟為壽暇則與學
士大夫觴歌其間日陶陶如也輔國病公侍牀
褥左右即如事賈夫人輔國病起有庭鳥數千

翔集不去人謂孝所致云嘉靖十三年今天
子遣中書舍人扈永通奉 璽書詔諭聖恩優
渥褒美盡實蓋從前所謂吳公請也公有仲父
同錯季父同鐵弟安湔安泯咸蚤世公殮之如
禮竝撫其孤捐田五頃立義莊以贍戚屬無告
觀察使齊公之鸞卒於官公贈棺一具異日子
具百金為謝不受壬辰汴有警城隍弗完戊午
學宮圯泐已未河決守臣議脩繕公俱捐助其
資前撫臣徐公讚柯公相咸欲䟽聞竝檄有司

建坊表章懿德公力辭乃已嗚呼救化奢麗古
訓耿光公以同姓世貴代有明德至公賢孝天
性宗族首善使得與事功之會何言更生汝愚
輩哉公生弘治戊午十一月十六日卒於嘉靖
辛酉十一月廿四日享年六十有四卒之日執
諸子手曰而輩循循克勤先王之訓吾不而慮
諸父昆弟骨肉也盡先業讓之吾目乃瞑諸子
唯唯公遂逝公娶某氏封淑人鴻臚女子六某
某某先後封鎮國中尉咸世其孝而長子尤

以經術著名女二長鳧山鄉君配儀賓某次遂
城鄉君配儀賓某孫五一未名女四皆幼以月
日塋於原塋之原先期禮官舉故事請諭祭治
塋悉如禮蓋典之大者不可不誌銘曰天胄神
明稱帝子黃社規京奠周鄙周南有詠麟之趾
洵也奉國文而美燁燁奎章下西邸藩室蒸蒸
藐哉擬流禊千秋閔廼被幽堂磐寘靈妥是中
嵩之雲大河水

中憲大夫陝西鳳翔府知府南泉孟公合

塋墓誌銘

公諱汝濬字子哲山西蒲州人也其自稱曰南
泉子云嘉靖庚戌余為進士逕鳳翔境聞公賢
投馬傳舍中接見公有古長者風嘆服別去十
三年是為壬戌余以禮官播遷領蒲州牧時公
服初衣率郡中諸大夫士拜余公室余執公手
問寒暄公已不知余余未嘗忘公也其不喜廣
交如此今年甲子二月二十一日公為治父喪
事過哀瘁竟疾卒享年六十有九余往哭之其

子植等將啓南澗祖塋側乃公元配史宜人之
宅奉公柩合葬焉持同郡少卿一泉孫公所述
世行狀竝從叔通判少岩公所為宜人壙記泣
拜請余誌其墓知余雅重公也遂不能辭按公
先世平陽人有遠祖諱元美者仕元為萬戶侯
國初編籍蒲州千戶所遂家焉高祖思義生浩
浩生琳舉成化庚午鄉試仕至淮安府同知琳
生鏞即公父號芝軒處士有隱德封真定府同
知配王氏繼李氏皆封宜人公故王宜人出也

公生於弘治丙辰十二月初四日時淮安公疾
且革亟命抱見之曰此兒英物恨吾不及見也
稍長即穎慧殊凡兒就外傳授胡氏春秋補學
官弟子為文章輒試必高等諸生成避之嘉靖
乙酉舉於鄉兩走春官不第時真定公年高願
其子祿養也促之仕公謁選授曲周縣教諭正
身明道膠序洋洋陞安肅縣知縣安肅故畿南
疲邑地衝民窘先令者纍纍挂冠去公至理棼
棼弊規畫井如有民郭治素刁黠善持官府不

能治公下車先收之巨盜劉九思叛獄無有踪
跡之者公密示方畧捕獲人服其能采風使者
廉公循良累章薦於廷徵拜間將置公諫垣以
王親例竟陞真定府同知去之日百姓號泣遮
道如失慈母至今尸祝公於名宦祠中公至真
定即署郡事廉明詳惠聲譽籍甚時沙河城圯
僉議謂此天子駐蹕地工宜速宜堅非同知無
可賴者公受檄督工經營盡瘁功成晉秩一級
時北虜寇大原迫紫荆督府命公保龍泉等關

卒恃無恐已而諸御史交薦公才宜顯擢疏入
不報六年著績上司功氏遂得封父母及妻鄉
人榮之甲辰陞長蘆都轉運鹽使司同知公分
理鹽政忠勤廉謹一官七年朴如寒士御史累
章薦之竟不報至庚戌始陞鳳翔府知府去之
日商竈泣留如安肅民公蒞鳳翔持大體尚德
化時郡中大饑公議減租發帑藏賑貸至捐俸
金作糜藥給民賴以全活者不可計鳳翔故秦
蜀要津貴人鼓行無虛日公性樸直不事諂曲

墓誌銘
有某者以御史左官河東河東御史檄其人
事鳳翔而過望於公不遂迺造飛語極詆公於
御史府公聞笑曰吾平生可告諸鬼神歷官幾
三十年可休矣遂投劾歸時真定公尚健諸子
弟又森森林立家庭孝友和風穆如暇則與郡
中諸大夫士結社觴歌其樂油油也所著有七
老集南泉稿若干卷藏於家公外貌和粹而中
剛介歷官四任環堵蕭然絕口不談人過尤耻
謁官府人以是稱長者云然佐公成德者則史

宜人宜人為同郡壽官史惠女自少雍穆壺闕
十二歲失恃即理內政父甚奇之擇婿得南泉
公及歸南泉公交相敬戒勤儉輔家兩遭姑王
宜人繼姑李空人之喪哀毀供祀克盡婦道南
泉公由曲周歷鳳翔凡四任皆與親就養宜人
躬操滌滌誠敬豐潔南泉公官長蘆病甚宜人
籲天嘗冀求以身代有叔氏四人皆宜人撫育
至壯四人亦母事宜人下至臧獲輩愛不廢教
嚴不傷恩所至輒勉南泉公曰官久祿薦厚幸

勿剝民為也故南泉公所在馳聲皆空人內助
之功乃不幸遇乙卯地震之害哀哉哀哉繼娶
甯氏無出空人生男八人吉兆早卒楨梧俱儒
士楨娶張氏繼楊氏梧娶樊氏繼崔氏楫櫛杜
俱州學生楫娶祁氏櫛娶雷氏繼陳氏杜亦授
春秋為時譽髦娶常氏繼薛氏極學舉子業娶
丁氏柱先選山陰僖順王婿縣主先卒娶張氏
女一適百戶李斌孫男一陳力杜出孫女四一
適范宗滂一許郝承志一尚幼俱楨出一許張

書行梧出嗚呼若公亦純德君子耶余誌草成
思公一事當表著者余壬戌秋甫視郡事城西
黃河從北來直衝西南城隅洶濤山湧聲過迅
雷距城垣不及丈許勢甚岌岌顧余守臣廼祭
告瀆神竝集諸大夫父老問計安出有議挑濬
行之竟不効公奮然曰必填亂石揀目前俟水
落徐議脩岸是策也余曰洪河可填乎眾亦掩
口笑公曰河流直下則填無益今據衝口如弓
狀且波濤盤旋况河水多濁以石投之則水將

盤石而濁泥自相膠固岸必成矣此事已驗於
潼關公勿疑余俛首思而是之遂下令集亂石
不旬日填之果平明年春水漲復循故道衝之
廼石愈固其水怒鳴一夜遂倒西數十丈去余
乃告之監司發金易石急岸之工成郡人大悅
上亦謂余治河效薦語在疏中嗚呼上下人之
賢余豈余材耶余藉公策起聲名今擢為潁川
兵備去他人未知之也余何敢掠美自炫哉又
為之銘曰 佳麗哉南澗之陽坎深而封昂是

唯南泉夫婦之藏右河汾左大行巍巍湯湯我
銘其永昌

居來先生集卷之四十一

居來先生集卷之四十二

銅梁張佳胤肖甫著

墓誌銘五首

承德郎禮部精膳清吏司主事掌中書科

事雙塘許公墓誌銘

國朝以名德公孤而四稱父子間海以內則無如河南靈寶許氏按許出周文叔後至元兵馬元帥諱威者西征過靈寶始家焉世系具家乘中元帥八傳而生少保吏部尚書謚襄毅進進

墓言金
有才子八人仲者誥南京戶部尚書贈太保謚
莊敏生倬雲南廣西府知府配某氏生公季者
讚少師吏部尚書文淵閣大學士贈太傅謚文
簡生僨尚寶司卿竟乏嗣是年公始孩文簡公
擇子姓賢者而獨器公乃告宗廟立為僨後自
是僨與其配任宜人撫育如已子稍長遣就外
傳奇穎天發尤工古書篆內外人咸以科目屬
之嘉靖乙卯而文簡公廕及矣授中書舍人使
慶成王府年甫十六秉禮雍容一切餽遺無所

受丁巳三載考績進徵仕即遣治中山賈司徒
墓事竣便省二尊人里中視親意所嚮山水園
林必治具奉輿周覽舞綵歌嘯以為常而尚寶
公日翩翩愉快也癸亥還京九載考績進禮部
精膳司主事掌中書科事會尚寶公病即告歸
田間躬侍湯藥尚寶公歿公亦取艾自歿日夜
籲天禱神願以身代尚寶公竟不起公治喪居
廬悉當於禮人皆謂尚寶公無子而有子矣丙
寅禫終起家守其官如故會 莊皇帝踐阼覃

墓誌銘
恩羣下公進承德郎加贈尚寶公奉政大夫加
封任宦人為太室人公職典絲綸冊卷百官與
封者有常儀公一一固辭士論雅重之公居邸
舍中不好與諸貴介狎遊益折節讀書以詞翰
與名公往還一時聲譽傾長安中無何廣西公
卒於家矣往公出繼尚寶也至壯猶不知身出
廣西也乃族中豪者以文簡尚寶相繼逝去謀
齟齬公或造蜚語使公知非尚寶出而離間母
子也公心識之事母愈孝既懼母之知非已出

又不能不痛廣西之亡也出則為位哭入則歌
笑毋前如常遂請假歸以襄事又念太室人高
年遂上書終養未幾公病卒矣父生母育至情
兩難公處此一無所歎不謂孝子哉公生嘉靖
庚子三月十七日卒萬曆癸酉七月十三日得
年三十有四配李氏孟津故都御史天寵女加
封安人舉子凡四俱不育立兄子渾然為子從
治命也以某年月日塋於某原嗟乎余遊公子
間而習知公公慧辨有志略脩治宗廟尊禮長

上席厚富而用有節御臧獲斬斬如也其他贍宗族裂券不與鄉人計子母錢公誠少年長者而豈意止是耶聞公屬纊時卽以誌銘屬余余何能負公地下遂據公內弟李君狀而誌之又銘曰太保者祖太傅孫太守者父符卿昆世胄高華照中原胡然蚤獨增煩寃醴泉無源芝無根悠哉彼蒼夫何言公形苑矣不死存黃髮金枝非所論長河大嶽奠關門玄堂崔嵬妥以尊君子來歸竝乾坤

累封太淑人高母王氏墓誌銘

貢士高君啓奎自列母太淑人狀帥弟啓翰啟心槭幣而謁余以誌銘請余通家子何能辭按狀太淑人邑處士王孟威長女也處士以陰德聞里中一夕夢二龍挾風雲繞其室驚起而汗未及燥則聞太淑人呱呱在牀蓐矣處士知為貴徵遂咳而名之云太淑人生七年不語一語卽問書所宜讀處士奇之日口授孝經內則列女傳諸書輒領大義旣長莊敬勤儉賢聲徹於

墓誌銘 卷之四 四十一
相之内外處士方為擇配會贈御史高純齋公者以季子叅政公有貴骨知處士女賢因媒氏紹介而委禽焉正德己巳歸叅政公時叅政公為邑諸生衡門簞瓢晏如也太淑人甘荼習蓼晨興夜作不憚皸瘃而躬秉耒耕叅政公畊則太淑人餉饁太淑人畊則叅政公讀書已而家稍稍自給叅政公得肆力舉子業嘉靖戊子舉於鄉明年己丑成進士授行人無何丁贈御史公憂母胡太孺人哭其夫喪明焉尋病痺不能

自為飲食起居叅政公與太淑人日侍湯藥迄禫終叅政公欲上書終養太孺人聞之勉以大孝在顯親揚名不空一命遽已也而促叅政公携家治裝太淑人自度太孺人不能不倚門而望者則惟子叅政公不能不停雲而望者則惟母太孺人與太淑人思欲得賢孝一人以左右者則惟婦太淑人遂留幼子啟奎相依為聚贈太孺人楊氏顧氏從之官乃得力奉姑日夜共卧起一切盥櫛笄總衣綦巾佩饘醢滌瀝與所

墓誌銘
以抑搔澣紉承唾滌廁之細必躬必敬者垂十年如一日矣時太孺人居郭東一夕羣盜持挺刃索太孺人為質太淑人以身翼之盜以挺連擊中其臂旋脫簪珥擲之而亟負太孺人隱叢薄中大哭曰夫雖宦達家猶窶人不腆救物任所取慎勿驚我老病姑也盜感而去後太孺人病篤執太淑人手祝曰吾享年幾九十寔惟我孝婦之德吾願而年若余而子若孫之婦事而亦若而之事余也言訖卒太淑人一哭幾不能

生云後叅政公為御史副使冏卿叅政二十餘年強太淑人與俱輒抱姑木主泣曰從君啗肥被繡豈非人情哉第姑在未嘗離造次今姑雖歿而神式憑之柰何遠去為也日坐一室績紡不休以督子之力學凡宗廟祭祀必親潔品物遇家人嚴而有恩自奉惟布衣蔬食親黨中匱乏者無不傾囊周之未嘗責報也嘉靖戊戌叅政以御史考績封孺人萬曆改元以子啓愚官翰林院檢討加封太淑人年際耄耄命服薦

嘉言金
加先後 天言褒寵曲備如太淑人者謂以德
動天者非耶今年甲戌九月初十日卒生弘治
辛亥五月二十日享年八十有四庶幾哉壽考
符於姑祝矣卜閏十二月某日啟叅政公見龍
山之壙而祔焉叅政公名懋為名臣行業具楊
修撰慎誌中男四啟奎貢士娶王氏側室張氏
次啟翰生員顧氏出娶楊氏卒側向氏次啟愚
乙丑進士翰林院編修贈太孺人楊氏出娶王
氏封孺人側室某氏次啟心亦顧出生員娶蘇

氏女二太淑人出長適沈人龍次適生員楊翔
俱卒而適沈者早寡持節三十一年蓋得太淑
人之訓云男孫女孫某某余惟古賢母性自有
之乎抑假夫與子而為名高也嘗觀太淑人未
遇稱糟糠若將終身也既貴猶然服勤以奉先
姑無幾微退言焉乃姑止而人且信其從夫於
宦自媿快矣則顧副其兩室以代當夕即命
服三加非家慶不以御而甘布衣蔬糲如飴所
謂儉而知禮孝而能敬亦性自有之矣余母沈

身言金
右列山房四十二卷
七
太恭人與太淑人生同里閑平生相敬愛如同
母兄弟居嘗言太淑人貴盛不忘貧賤行坐必
及先姑自孝親勉夫教子齊家而外無一事入
於心大喜不喜大憂不憂情者化為勤奢者化
為儉則太恭人亦庶乎稱知言矣嗚呼敬姜達
禮黔婁樂貧趙姬無妬孟母教訓樂羊化暴而
太淑人斯箴之矣不然叅政公有內顧則何以
歷中外而稱名臣諸子不藉膠木之德又安能
啓諸譽髦而太史公者日論思 人主左右哉

銘曰 胡然而生也見龍兆祥胡然而死也見
龍是藏祝言于姑孝乃純駢寵自天眷乃申維
佳氣之葱然斯二室之融然式啟式祔言作之
述罕如宰如樂哉茲丘

文林郎湖廣衡州府鄱縣知縣涪川趙公
墓誌銘

故鄱縣令合州涪川趙公於萬曆三年十月五
日捐館舍踰月而余起家過合哭之其孤之可
等列狀頓首以治命請曰不肖敢為逝者微惠

墓言金
石刻山房四十二卷
一言余謝不敏則又曰惟先君子獲稱公同年
友也而最心重公既易箠而執不肖手曰吾目
必待張公言而瞑余聞而悲之按狀公諱汝為
字宣卿讀書涪水之干學者稱為涪川先生其
先楚孝感人有諱文先者避元寇徙蜀之大足
文先生興宗宗生以仁仁生忠仕為楚常寧縣
令見合州一都會也而江山文獻甚勝乃從大
足北徙而籍之遂為合之萬安里人常寧公生
應舉仕至雲南府通判生官正德丁卯舉省試

辛未成進士授南京戶科給事中凜然白簡之
聲以用直出為福建僉事至今閩人猶能稱述
風裁云僉事公生子三公其季者生而靈明少
從父宦遊每出驚人語僉事目攝之曰是兒吾
家千里駒可令趙氏不孤矣稍長授毛氏經一
治博士家言即傾其作者補州諸生文譽日隆
起晝夜下帷伊吾之音無間寒暑自是胸貯古
今下筆奇發御史金深督學副使周復俊有知
人鑑試公俱第一郡中子弟咸北面師事之涪

水之上洋洋如也嘉靖己酉舉於鄉三試禮部
輒北一時士論譁然不平而公亦且倦程式業
矣丙辰謁選授雲南廣通縣教諭廣通在西南
徼新建學其俗雜夷而士稚少文公日帥弟子
謁先師廟畢則擁臯比擊鐘鼓橫經而列弟
子於堂皇首陳先王五常以及脩齊治平之道
旁及經史百家則又亶亶談藝文日有課課有
等務在薰陶涵養未嘗夷鄙其人而責以所不
能邑之士始知自貴而人人嚮慕文學其俗為

一變矣庚申擢鄆縣令鄆故衡東巖邑也其地
接嶮峒而民徃徃習獷桀公至一以威惠劑之
其民相與手加額而稱趙父山間有萑苻之子
聚萬人叢薄中探赤白丸而橫行鄉里諸郡邑
惴惴戒嚴公申保甲簡士伍堅城守又擇健士
以計而捕獲渠魁與其黨自是境內無夜吠而
諸郡邑高枕卧矣民故好訟卒相詭而務為勝
公以片言平之各得意去公雖斤斤然守三尺
以毋狗屈至大獄則恒恐失惟輕之意而犴狴

是清夫公既用循良高第以聞諸兩臺使者無
不謂旦夕需徵拜也顧其時分宜倖相以財賄
走天下而監司太守則爭先赴之日夜大望州
邑之吏公獨持廉正佯若不解其指遂不得當
上意而公日賦歸去來詞乃携一二平頭露橐
而挂席洞庭溯三峽歸矣歸則角巾野服謝跡
公府斥地銅梁銅山之陽誅茆結舍手植五柳
以彭澤自况時或筇竹蠟屐臨高以頰二江之
流客至則命觴霑足客之醉醒一聽其與暇則

羣諸子講德程藝尤諄諄於忠孝廉恥之教州
俗浮而多儂惟趙氏子身不入狹邪以自守於
繩墨人多公義方之貽也公生弘治癸亥九月
廿三日得年七十有三配翁氏男子四之璧蚤
卒之可之玉之屏俱州學生員以文章名能世
其家者女一適孔澤男孫八某某以某年月日
塋銅梁縣蒼山原祖塋之側嗚呼公之平生具
是矣余於里中視公為執友及同舉於鄉則公
以弟畜之余習見公純中長者孝友性成卽生

名族而瀟然無紈袴之氣余每從休沐省太恭
人山中則過公飲自顧隕然而公浮白不少衰
余謂公高年寧當節之公笑曰東方朔孔文舉
劉伯倫陶元亮李太白非古聞人耶乃起而朗
誦酒德頌醉鄉記陸譖傳已則歌少陵八仙歌
青蓮對酒詩余遂閉口而心伏公達者又為之
銘曰 公神無不之乎非金碧之野必祝融之
墟進而為虔也擅喬也鳧退而為浣花叟為高
陽徒使人生則歌諸市歿則哭諸途指趙氏之

阡而語曰是滇楚之名宦梁益之大丈夫於戲

齊庶人乾塢先生墓誌銘

齊庶人乾塢公卒其子遵訓等持憲副楊公家
相狀拜請余銘余念季夏之月公初度而稱五
十公族諸君子欲得余文壽之謝不敏去豈意
兩閱月而竟銘公墓也悲夫按狀公為 高皇
帝七世孫賜名慶寨字向化考宮於西北之偏
都人士稱為乾塢先生云初 高皇帝第七子
齊王博者封青州是為公始封祖建文中國除

靖難後尋復尋削居廬州王薨而子賢赫在襁
褓景泰初徙置南京虹橋里有司歲計口而衣
糧與他吉凶之賜世有成制賢赫生能增能增
生長鏃長鏃生可淳號碧泉先生有賢聲娶都
指揮田茂女而生公公生而端偉殊凡兒言動
如大人長者碧泉公心異之為延師授經輒了
大義雜治舉業之文無弗傾其同塾者故事宗
人不得與里選公嘗仰屋歎曰劉中壘李贊皇
趙右相非帝王苗裔耶卽不能如三子也者論

議朝廷而儒雅風流寧令吾不為北海青蓮而
徒衣食縣官已耶乃益折節讀書務為恭儉一
切謝絕狗馬絲竹之好公貌英傑有識度抵掌
談當世之務率能傳之經術而又多賢豪遊族
有致大獄者人人危之莫敢誰何公挺身白見
冤狀卒以平反以此節俠之譽著於內外而凡
里中緩急無不願公居間矣別選邸第之傍築
一畝宮左圖右史壘石種花日與縉紳學士觴
詠其中訢訢如也客有說公斥地自廣者公曰

古人有成言矣會心處正不在遠鸞鳩之趣奚
羨乎九萬里而南為耶盜有火公江洲之蘆者
家監捕得之將赴諸理公謂盜誠無賴吾不忍
以一葦故而令瘦死犴狴竟縱之去由是四方
客爭言公長者矣公生嘉靖丁亥六月六日卒
於萬曆丙子八月十二日配陳氏側室朱氏子
男四遵訓娶湯氏東甌王孫允孝女遵誥娶徐
氏中山王孫大順女遵譽聘沅陵尉陳致和女
俱陳出遵誌幼朱出女五長適劉國棟次適徐

永嘉次許顏倬次適壽國賓次尚幼男孫三尚
文尚質尚德女孫二俱幼以某年月日葬某夫
余先三年而撫應天今起而卿光祿故無所汎
愛也卽公稱世之佳公子而面者僅三耳然余
甚賢重公豈直慕義循理為名高哉又嘗知公
舞勺之年而母田卒哀毀至不欲生歲時奉碧
泉公外效斑斕之舞退則誦陟岵之詩以為常
碧泉公病為侍卧起及卒易戚合中克致大誼
弟病毒垂絕公為籲天延醫手製藥而嘗之遂

無恙有姑蚤孀而貧無倚公迎之歸與繼母田氏居屬其家人曰姑而猶吾父也田而猶吾母也幸相與善事之姑竟誓栢舟事聞於朝旌之無不謂公成其志也公之孝友天性類如此余觀世祿之家無不豪舉有能謬為恭敬得好士名至家庭若胡越然余益賢重公也而惡能不銘銘曰祝猶在耳弔已在門吁嗟乎齊王之孫孝友為政五十非歿翩翩乎公族之表其胄也神明其死也哀榮是堂是玄是銘是鐫鬱葱

相望孝陵在天龍氣昭回萬斯年以保爾子孫
兮同此阡

脩職郎奉新縣縣丞柏山李先生繼室王

氏墓誌銘

嗚呼戴已聖善穆伯世有令名穆姜孝慈程興感而雍睦母儀婦德遐哉邈矣李太母者故奉新丞柏山李先生繼室而里中王氏女也粵若王氏胄啟瑯琊世執黍稷母之父曰仕太者醇竝葛天行高麗德薦生吾母卓有貴徵母生而

莫言金
卷之五
婉淑純備令儀坤貞合道短褐高鍾離之風陰
教夙閑中梱方孟光之軌誠傳經則是義必明
絲臬酒漿無才不備右族紹介於媒灼奚翅一
門父翁偃蹇其夫君既踰廿載而吾先生者朱
絃再斷居嘗思續於鸞膠總帳重施永言靜好
乎琴瑟卜得天妹遂假冰人而王翁者方擇配
於梁鴻忽命中其屏雀于歸之子宜爾室家惟
時先生目無全牛學過半豹誠易事而難說必
左準而右繩母則婦道妻道克孝克恭上承驪

於舅姑下敬順其夫子溫顏下氣口無疾言茹
素甘荼首無玩飾撫遺孤不殊已出睦望族俱
協人情雖冀缺之餉饁何以加諸即少君之鹿
車風斯下矣已而先生終困穉苑偕計有司抱
管輅之才從趙典之任爰二繁邦母專內政機
絲累疋之語造次難忘雞鳴警戒之詞朝夕在
耳固扃鑰而苞苴潛折服辛勤而杼柚猶鳴先
生內藉賢媛外脩牧政吳孫堅之丞下邳大著
聲稱桓君山之佐陵安初何不樂已而垂橐西

墓誌銘
居平山房四十二卷
十一
歸了無長物先生不改儒素吾母益勵清貞躬
蚕織而佐夫和熊丸以教子先生位不配德而
母多北郭之規先生官不濶家而母感牛衣之
對使先生志不摧於解綬季公學愈重於凌雲
所謂父德母儀是耶非耶母生於正德乙亥年
五月二十一日卒於萬曆乙亥年九月二十六
日春秋六十有一子孫某某卜某月日啟先生
之兆而祔焉亦既暮月矣遲乃執從兄李太學
巡狀泣請曰先子之歸公既列傳今母見背公

恐弗銘某遜不獲也夫卑不述尊門客何以謚
柳下內不稱外栢舟何以列鄘風母德幽貞慈
音日遠晏子不逢杳矣齊廷之命婦秦臺未築
悲哉懷清之芳華凡在親踈俱垂涕泣况爾門
士得與斯文者哉乃銘曰 乙亥而來乙亥而
往豈其數之不爽廉吏而夫名儒而子實維德
之肇起可限者其年不可限者其賢母賢而名
是傳母往而室是玄吁嗟乎指李先生之新阡
者孰不曰偕老乎重泉

墓誌銘

居來先生集卷之四十二

十七

居來先生集卷之四十二

居來先生集卷之四十三

銅梁張佳胤肖甫著

墓誌銘四首

加贈奉政大夫大名府同知崔公配穆太
宜人合葬墓誌銘

是誌也崔大夫歿二十年穆太宜人歿七年既
葬而祔之矣隆慶庚午大夫冢嗣憲副君近思
備兵趙余備兵魏一日詣余再拜請曰某小子
不孝二尊人葬曾未誌銘其墓幸有待於子也

墓誌銘

居來先生集卷之四十三

一

仁二百九十三

某將啟壙而納之以致大誼余與憲副君為同年友視二尊人猶父母也何能辭誌曰公諱某字某其先晉文水人洪武初有高祖成者徙于濱家焉成生某某生進進生端贈文林郎受室張氏封太孺人側室秦氏贈太孺人端生公公自少簡重不好弄八歲誦書數千言文日益有名既補郡諸生益折節攻舉子業一切求諸理耻為剽勦之習非流自胸中者不以屬草以此諸生下之舉正德丁卯鄉試數偕計公車不第

母春秋高家立四壁無以供菽水庚辰謁選授鎮江府推官鎮江故繁麗郡公操執愈嚴廩餼外不以一物內舍中會有方士腹中能人語扣者言已往禍福甚具金壇令收之傳採生律論棄市公白直指使者曰此使物術為糊口計無他謀也不則即令此囚以術教市卒姑驗之已而果人人能腹中語遂減死公司理五年其治獄多類此故明直廉恕之譽大江以南如一口也嘉靖丙戌擢許州知州尋聞嫡母張太孺人

憂去巳丑補岢嵐州岢嵐近塞下地寒不宜穀
時百姓大饑公發廩勸分賑活者以萬計及秋
大治亭障斥堠城堡器械又令各堡清野刁斗
金鼓之聲城堞相望每凶奴至輒立馬四顧咨
憤而去癸巳擢平涼府同知平涼郡縣皆同姓
諸侯王食邑善逋負而諸侯王率窘有司公至
督租贍給疆宗甚德之丙申間生母秦太孺人
憂去巳亥補大名府大名土沃民淳為右輔良
郡公攝郡事務與民休息日勸民間孝弟力田

禮讓之俗洋洋乎漳衛之上至今人猶稱崔大
夫云壬寅乞休歸田里間杜門十年以辛亥正
月廿七日卒年六十九歲配穆太宜人為某女
少有內德既歸公操井臼佐公讀書寒暑無間
性尤莊毅家人有過失不少假借即諸子婦日
侍左右無異嚴師然性儉朴一澣衣數年不易
閨以內至糞除滌濯細事必親八十年如一日
也初封孺人以子近思奏績加封太宜人後公
十四年而卒是為甲子年八十一歲男四近思

舉嘉靖庚戌進士山西按察司副使近裏鴻臚
寺序班近性俱穆出近臣側室楊氏出女四某
某孫男八某某孫女四某某余兩官大名好問
前後人治行熟於奉政公之賢也奉政公故貧
邊郡勿論如京口魏都至富厚而公瀟然不携
一物所在輒以循良著聲太宜人自笄及老以
勤儉佐公始終成其令名未仕而公不憂於貧
既仕而公不淫於貴斯為難矣人言崔大夫長
者太宜人故健豈不於嚴君慈母之說背也嗟

乎大夫誠長者藉第令太宜人濟以寬嘻嘻之
吝齊家所由忌者故居室而三致遷今猶誦母
德不衰其潁川渤海之治非長者為之乎銘曰
歷郡慈也寬然愛如母齊家嚴也儼然敬若
父父而母惠更循良母而父義家道昌孰是躅
斯芳雙玉名乃長岱宗渤海包玄堂二靈優哉
維其巖

冷太母朱氏墓誌銘

母慶陽府教授近菴冷公元配也始母隨教授

公于官日思歸比遷慶陽教授公幡然解組去
母益喜得謀西棹歸矣時仲子某尹枝江迎養
二尊人邸舍中至隆慶庚午二月初八日未時
母慕注卒枝江君身奉永訣含歛如禮人謂有
天道焉枝江扶襯歸卜兆城北甌氏之原以是
年十二月二十七日塋先是枝江自列狀記抵
余書大名徵銘書至母葬已逾月未之銘今年
再狀且泣血拜書曰先母葬不得君銘何以贖
不孝罪又何辭於家大人余初不知尚有待乎

庸言也按狀母姓朱為邑東平里民朱萬鍾長
女幼敏慧有異操在相闕中與兩女弟侍寢大
父母所大父母好夜談旦晝見聞事語刺刺不
休兩女弟輒成寐獨母應對辯決如偉丈夫夫大
父母嘗謂人異日相吾宅者斯女乎斯女乎壬
申歸教授公慈孝莊敬明章婦道冷氏故望族
諸兄弟共食子姓僮婢指千數母御之無不當
大小心乙亥教授公為縣諸生母勅斷相內外
諸米鹽尾瑣不得煩教授公遂一意嚮學稱名

儒焉邑田租歲大半轉餉松州戊戌代輓者率取
竒羨為奸利諸伯氏心慕之母愀然起曰先人
遺諸孤救廬薄田即風雨饘粥何憂也而必欲
染指邊餉自辱公府乎諸伯氏頗以為婦人言
竟被逮如母云教授公與同產弟生員晏川公
不忍手足窘有司也至鬻產力救之家遂中落
徒四壁立母未嘗有幾微怨色益拚節為儉力
田畜拮据鞅掌勤事緝織勵夫督子肆志研讀
之業已而教授公廩伯子起高贊仲子為時譽

髦季子齡年即善屬文母一日私語教授公曰
君諸兄不及事矣獨叔氏至親筑筑在焉而父
子今錚錚然起忍令叔氏自苦耶遂同居內外
雍雍無間言服共采食共席出入共道孝友之
聲徹於郡邑至今遠近人猶稱銅梁二冷二冷
而豈知尚有賴女貞扎母既相夫起家廼朱氏
則寢微母脫簪珥市種狷約諸弟姪非農桑所
出不得衣食不守先業無相見朱氏果振起如
祖父時伯兄嫂與其女弟遺男女幼而孤母撫

之不異已出長皆婚嫁之後教授公偕計典教
桃源再遷遠安母勤儉如未仕日教授公好與
諸經生陳說古今之道月必程校其莠母具美
飲食以為常教授公性好施予急貧士母一一
中所欲故兩邑諸弟子感激教授公至泣下者
而亦未嘗不以賢德歸母云母生弘治乙卯十
二月初八日子時得年七十六歲子孫某某嗟
呼余歎女德下衰於母有慨於中也吾猶及見
里中三十年以往風氣愿而樸比歲靡美女子

設形容揄長袂跼蹐鬪玩不爾不重如母者平
生不嗜肉味寡言笑經費出入秋毫不得妄至
大義可予處雖倒囊甘心焉尤斥綺縞粉墨無
所事即處富貴七十年如一日也不可謂難哉
余誠懼母歿後陰教不行於里社中益令女士
家富相高貧相習風俗不可為已余於母豈獨
憂一家儀刑乎銘曰 江山秀於蠶叢而爰發
爾宮眉之程閭之馮歷數百年我母乎並風生
以提備歿以壽終孰謂善無報迺左驗諸此公

玄武之里水如字嶽排空羅計照之母歲兮坎
深而封隆噫嘻哉千秋萬歲茲銘其無窮

中順大夫雲南廣西府知府號田許公墓

誌銘

隆慶四年六月某日中順大夫雲南廣西府知
府號田許公卒於家越明年正月某日啟屈夫
人之兆合塋於某處先是訃至大名其友人某
為位哭辦絮酒束芻為文往奠之會其弟任儼
子茂柯械書狀來千里之外且遵公遺言必欲

得余銘即不文何能辭也誌曰公名侶字令夫
號號田河南靈寶人為莊敏公長子生而穎敏
端慤如老成人稍長就外傳授戴氏經善屬文
補學官弟子侍莊敏公留都則卒業何栢齋先
生之門薦行古道不但以文字出諸生上也莊
敏公廕子以序及公公方嚮意科目遂遜弟儼
三年儼病卒公補廕非其志也公授前督府都
事時叔父大學士文簡公柄銓政廉正有名入
不敢干而覲得交驩公益杜門謝賓客日侍叔

邸舍中家事外不預一語無何經歷左府故握
政者多勲貴人視貨賄如常儀公叅軍一滌夙
穢後免喪起補中府聲名如左府時一時翩翩
佳公子不能及也適雲南廣西府缺守難其人
善宦者又避之乃用公毅然就道廣西在滇西
徼外去中原萬餘里地險阨多毒癘其俗大半
蠻夷最號難治凡郡守下車其君長贄獻名馬
金寶犀象貝劔諸物一中之即靡矣公一無所
受亦未嘗夷鄙其民忠信篤敬行之終始如一

日而境內大治故事郡守歲入五百金供饘粥
公捐之脩城池學校暇則羣諸生談藝而殊方
至今知中原有莊敏之學士酋瓏攻襲父官循
例橐裝千金為壽公曰而速負去斷頭矣自此
番漢讐服戒莫敢犯未幾夷者襪等糾眾寇道
路公檄瓏酋禽之如折枝然黔國公庄田遍南
滇庄人恃勢侵盜郡人公悉寘諸法不少貸黔
國憚公威廉腹銜之公又條議地方七大事一
設守禦二清夙弊三革夷俗四崇學政五增哨

堡六脩城池七禁誣訟時御史黃中行部郡中
嘉其議下所司守勿替公三載任滿治行為諸
郡第一兩臺使者先後四疏薦公可大用公去
之日告城隍神曰 天子不以守臣無狀命縮
章與神分理幽明守臣才短不能為百姓有所
興除今束裝赴司功氏假裝中自公廩外受番
漢人一錢願明神殛之以警墨吏聽者汗沾沾
下是日大小嬰焚持牛酒遮道號泣送公公亦
泣余嘗視學滇中好求賢良異等至今廣西稱

良二千石者必曰許使君許使君云公便道省
楊太夫人當赴考時相嵩父子以權賄奔走百
官公自度不能具又念楊太夫人高年遂上書
致仕公嚴正清約有父風天性孝友初莊敏公
卒諸弟幼公扶櫬留都乞恩 先帝一一如禮
教二弟為名儒歸三女弟俱名匹事嫡母尤孝
謹宗族鄉黨人無間言莊敏公平生多著述公
梓行於世使正學開明發前啟後公可謂肖子
矣公能詩工晉人書足跡所窮篇章盈帙居家

耻干謁日携琴尊坐函谷草堂中與親友話桑
麻或時從叔父太保嘿齋公觴歌几杖間宛然
阮謝家風也公所著有耕禮稿士林甚珍之公
卒之日拳拳以不得終養揚太夫人為恨勉諸
弟子姪輩以力學承家言訖卒卒年若干公上
世出虞廷四岳伯益後迄於宋元代有名德詳
具家譜中祖某父某子女某某張子曰本朝
父子四尚書稱名卿者海內惟靈寶許氏許氏
故多賢公賢歸然在諸公子中余交四方士而

所云公子者類皆挾才地若公者世胄高華文
學純備所謂才與地者非耶余見公服食居處
蕭然如寒士抱經濟大略而未究所施亦何嘗
自鳴其不平信獨行君子也追憶余往年與公
閱莊敏公所藏房杜像贊酣暢中謂余曰先公
尚遺一玳帶嚴氏子索之甚力余茲行予之不
孝不予中竒禍頭可斷帶不可得一太守何能
易吾先人物耶嗚呼方嚴氏柄政時購四方竒
玩奔走其門者何筭公以一帶故視秩真二千

石如土直然此直節與襄毅莊敏忤閹瑾者一也公嘗自狀曰某處世俗上得懶字力處門閥中得貧字力有味哉其言之也非得父祖之傳能作如是語耶余當時欲索觀此帶公笑曰且休姑留此覲公異日過里中毋相忘也悲夫余終當西入關顧公長往矣投涕而銘之 靈寶有許四岳造基四卿象賢精秘包結代釀名德而生號田為才子弟為良太守家聲纏綿偉績善行近布中土遠浸大滇玄堂坎封翼莊敏墓

佳哉新阡父子祖孫穹碑相望過者式焉洪流孰長條華孰久我銘與傳

居來先生集卷之四十四

銅梁張佳胤肖甫著

墓誌銘六首

蓬州儒學訓導勤軒胡公墓誌銘

胡公謁選人除蓬州訓導齎裝行盡不能陸具
迺犯夏漲挽舫艤峽江中卒溺死秭歸間蓋萬
曆丁丑五月廿六也踰月而其子某等聞訃亟
往收其屍還葬雲梯山麓蓋是年十一月十二
日也公之姻友蘇君伯濟撰次公平生為狀携

其子自蘇等謁余請誌銘其墓嗚呼公余益友也所欲為公志且銘也者則胡能文所不欲為公志且銘也者則胡忍以不文辭耶按狀公諱敏與學其字居嘗以勤署其軒遂自號云上世本楚人有祖希茂者徙銅梁西平里籍焉再傳而生月東又徙邑東北雲梯山下生誠誠與其弟詔孝弟力田耆德並茂誠生賓岳公之父也以毛詩起家文學為全蜀士人之冠卒困於有司貢授湖廣夷陵州儒學訓導可數歲遷鄰縣

儒學教諭咸以經學行誼師表兩地至今祠於名宦娶劉氏生二子長敬次即公初賑公時教諭公夢一人乘驄馬折桂枝授之覺而公生桂氣猶氤氳寢蓐間也教諭公曰是兒當應桂遂孩而名之公生而聰慧莊慤一顰一笑必納諸繩墨中尤酷嗜圖籍得一編至忘寢食務成誦而後已凡書之力不可購與人有片言善者一手記之幾可汗牛嘗從教諭公夷陵夷陵人憲副鄭伯生者以毛詩魁天下公卒業其門鄭

稱為小友歸補博士弟子下筆數千言不休試
輒第一數上省試不售竟迤邐公車矣公平生
質實不好弄有侮者容之詒者信之事母劉至
孝遇赴試則愀然不樂以不能湏臾去慈幃也
值兄嫂喪如喪考妣撫其孤若已子蓋其孝友
天性固如此公所為古文詩歌類能尚法以公
該博百氏有之而似矣私居必衣冠危坐雖盛
暑不褻有司最賢重公而絕無干請自讀書外
不復知有他人皆稱為行秘書云公生嘉靖甲

申年十月十六日寅時得年五十有四配蕭氏
子孫某某嗚呼公之平生具是矣嘗聞之語曰
期年樹穀百年樹德公之先勉為德者何啻百
年而始一見於教諭公再見於公俱未有所究
也豈善不可恃耶先大夫從教諭公遊而教諭
公有育楚材甚衆如中丞王君篆太守雷君以仁
輩又其最顯居嘗王中丞與余私嘆教諭公作
人甚盛而胡公之究用未光也嗚呼功莫大於
開來天必有以報公之子孫矣又為之銘曰未

墓誌銘
然而不可料者公之事鬱然而不能平者公之志魂兮歸來母為陽侯之使惟有銘幽堂千萬世之利是依是庇

處士雲石譚公墓誌銘

譚氏之先河南光山人也有諱某者始徙銅梁之東平里而籍云某生某某生錦舉成化癸卯鄉進士授某處教諭進將仕郎錦生溥舉弘治庚戌進士授翰林院檢討贈奉政大夫溥生紹宗舉正德鄉進士歷常德府同知以顯陵功特

陞朝請大夫加四品服俸娶張氏封宜人生子三伯畏貢士仲思武昌縣訓導季即公也舉公之夕張宜人實有異兆公生果敏慧稍長端慤如老成人授毛詩尤善屬舉子業其時譚氏之堂四世雍雍公尤以器度見奇於二祖嘉靖丙戌朝請公謁選與張宜人不欲公一日離膝下一守興國再守鎮南尋晉常德自丙戌以迄癸卯皆公侍養得二人懽又多從海內賢豪長者遊旁及書翰甚有帖意及朝請公謝事歸公自

度年寢長羞與童子伍遂棄去舉子業授郭外
上腴精專汜勝周侯諸家言公性不大飲然日
飲卯酒數杯頽然而誦陶柳之詩恒自負曰第
五之名又何必減驃騎耶公事親孝事二兄悌
遇妻子減獲以及宗族鄉黨咸以恩義相劑平
生無片語欺內外無缺行愧天日公以累世華
胄一切布衣蔬食絕無裘馬之好豈不裒然賢
重佳公子執公諱昇字元約別號雲石生正德
丙子九月初四日卒萬曆戊寅七月初八日享

年六十有三娶王氏側室周氏男六長弘湛縣
學生員娶冷氏次某某卜是年十一月初五日
葬於祖塋之側其子弘湛列狀而請余銘余於
公中表兄弟也即母論親黨公之賢其可氓耶
銘曰奕奕者世家而稱常布翩翩者公子而薄
紈綺豈留餘於造物俟來哲於旦暮而歸兮玄
宇余銘兮黃土並先阡以永存其無忝者爾父
與祖

恭淑蘇孺人墓誌銘

恭淑蘇孺人卒凡六閱月而塋其夫光祿公自
列狀械幣遣二子某某過余廬居以志請余孫
謝者三已讀狀肅然起曰是可志也今夫設形
容刺繡文以至絲枲饋漿之敏辦豈不諱然稱
婦人哉然非其至者若孺人乃可志也按狀孺
人姓王氏為安居縣安居里人父某舉正德己
卯鄉試仕至略陽縣令有循吏聲配丁而生孺
人孺人天性莊靜和慧畧陽公奇之曰惜哉女
也不者當大吾門為之偃蹇其配時光祿公父

冠山公者用計然之筴以脩其息家僮干指江
量巨艦然好儒而賈非其志也晚舉光祿公有
貴骨私嘗語曰安得王氏女而子舍乎略陽公
亦私語曰安得蘇氏子而館甥乎無何紹介媒
氏而二姓之好遂定里中人比之雙玉云孺人
既歸光祿公也年甫十六一切婦儀與內則合
姑劉嚴時時以他難事嘗孺人孺人母不當意
指自是劉安為姑矣孺人以仕宦女歸富厚之
室乃日御澣衣菲食無重珥重錦之玩又懼光

嘉善錄
卷之四
六
祿公之席上貲而倦學也每從容請曰尊璋比
於素封所不足者以封待若嗣君誠才而不能
用儒顯如二尊人鮮餘日何光祿公錯愕謝遂
發憤力學竟用明經歲起偕計上公車已而舅
姑相繼歿孺人始專相政凡中外親疎之應酬
大小臧獲之執役山澤農業之程課孺人言不
出於梱而家政斬然視舅姑時者益之後光祿
公謁選授南京光祿寺大官署署正孺人與俱
愈拮据為儉以佐夫之操履光祿公由此顯名

公卿間孺人之助也至乙丑冬妖賊起邑之公
私舍焚掠且盡孺人時在里為飭僮僕百計捍
禦賊竟不敢犯其屢居為燹所延燬者以百數
刻日而新之所謂女中丈夫非耶迄光祿公
請告歸也孺人日贊以耕讀之業光祿公性故
卞急而好客或勝地佳辰隨興所適而飲食非
時之需孺人無不立辦光祿公好施予四方之
遊士與親疎之告急者孺人先意承之未嘗有
難色孺人有兩才子嘗教之曰爾祖不得儒而

望于爾父爾父儒矣而欠者一第今不於爾輩
誰望哉乃為之延師擇友日夜切劘不衰長公
為時譽髦人咸目為公輔器次公方入冑監翩
翩然有青雲之望夫為德於夫而稱賢婦為德
於子而稱賢母孺人其無間然哉孺人生於嘉
靖乙酉八月二十一日卒於萬曆戊寅十月初
三日卒之日無他疾忽執二子手曰方寸甚亂
似不可為爾惟立身揚名以成爾父祖之德言
訖而逝得年五十有四中丞胡公題其旌而謚

之曰恭淑其然乎其然乎孺人二子某某男孫
某某女孫一尚幼某出卜巳卯年四月初四日
葬於城西三里五寶山之原嗚呼以余所覩孺
人事舅姑也有桓少君挽車之節相夫也有樂
羊斷機之規誨子也有鄭夫人以荻畫地之操
其富而能禮也有公父文伯之母之識其奉宗
廟也有采蘋之敬其樂於惠下也有小星之慈
余素習光祿公則又聞孺人恒勉光祿公以友
天下士乃光祿公則好余而孺人亦時時問勞

余室向恭人愧余不能當天下士即余一人而孺人佐光祿公之多海內長者遊益信矣此又非山巨源之內鑑乎余又為之銘曰海棠之陰寶山陽前而畢如姑與嫜孺人從之鬱相望有鬣其封期龍章以永千秋樂未央視我銘兮玄之堂

陝西延安府通判石門李公墓誌銘

余嘉靖辛亥間令滑滑有石門李公者德禮長者也隆慶己巳余兵備大名公時致延安通判

事歸然猶及面而書問數數不絕去冬余起撫上谷則從滑人問公已捐館舍矣余為之哭而辦香束芻奠之今年公之子諸生杖者踰居庸謁余上谷臺中長跪奉所列狀泣請銘其墓且曰先考治命也惟余知公深奚能辭乃槩括行略為之銘銘曰繫若石門崛起靈昌冠蓋右族淵源孔長迄於王父橫經上庠薦生厥考參藩晉陽猗歟李氏而始大光鼎材駿發公也騰驥少負岐嶷為主為璋克紹箕裘震耀宗祊敏堪

倚馬博辨商羊凌雲賦就藝苑名揚材驅管輅
文准班揚家廷孝友月旦寔彰狗監不逢和璞
自傷竟與計偕氣愈激昂四海俊傑參差雁行
英聲嶽立萬夫孰當晚謁選人別駕西方時惟
金明獫狁內訌公職典餉羽書勸鏘鉢必計
苞苴誰倡軍城保障屹乎金湯亦有墨吏致卒
猖狂鼓譟脫巾萬室踉蹌惟公鎮定按堵邊疆
臺使推轂剡薦交章治行第一需次巖廊偶厭
風塵投劾慨慷賦歸去來滑臺之傍巾車自命

瀟然橐囊家有田園架有縹緗乃圖乃史乃灌
乃堂乃希巢許乃師老莊彭澤元亮畏壘庚桑
神完丹府夢破黃梁九霄鴻鵠千仞鳳凰劒歌
間起星斗光芒酣吟迭奏金薤琳瑯成一家言
以表詞場監司大夫守君友邦歲時式閭干旄
央央公竟鑿坏避世東墻跡無一室業有尸鄉
過客逆旅委順徜徉北窻隱几白首羲皇公仁
有後蘭玉啓祥伯兮仲兮合璧崑岡季也天民
貽穀允臧聞公健飯七十康強期以喬松而遽

云亡聽彼遺命以屬諸郎欲我不朽乞銘銅梁
銅梁知我孺子勿忘嗚呼哀哉聞者悲涼白毛
之里有秘斯房厥阜蜿蜒厥土玄黃我銘相守
地老天荒石門先生茲焉永藏 公諱士溫字
玉卿號石門世為滑縣人高祖考某曾祖考寶
祖考增生員贈朝議大夫父考暹山西布政使
司叅議母某氏公生正德某年月日卒於萬曆
己卯八月十五日春秋七十有一配王氏子三
人伯欽仲杜俱生員季檀五女適某某孫男四

某某卜己卯年十一月念四日塋白毛里祖塋
之東南

劉太母惠氏墓誌銘

劉大夫守吾合踰二載所為乳哺一州二邑之
民功德甚大諸父老子弟惟恐一日而去慈母
之懷至相與援故事謀詣兩臺使者 請得賜
爵級領州如故謀甫定而惠太母之訃至諸父
老子弟咸為位哭無計挽大夫矣嗚呼傷哉大
夫自列母行草狀以誌銘徵余為之義不得辭

也誌曰太母姓惠先世在戰國以博辯聞者曰
施傳至漢曰乘為交趾太守曰相為太僕又傳
至曰某者扈從高宗南渡遂家於常之無錫又
若干傳曰思孝者別號心萱則太母父也母生
婉淑有志操稍長精女紅多所悟創心萱公竒
之必不耦凡子時大夫父東谷公以豪傑自命
益務為折節讀書心萱公見而異之曰是夫也
庶幾東牀佳士哉遂女之母歸而姑周嚴時時
慮新婦無當或故非分督過以觀母母兢兢曲

承之而姑為大寬時東谷負雋聲里中賢豪長
者遣子弟北面受經東谷公以舌代耕而所得
者母未嘗私纖悉充簪珥而甘膳則晨昏進矣
姑病母為籲天手湯藥嘗而進之姑竟不任治
卒母佐東谷公克致大誼易戚合禮東谷公故
好學而數不利嘗仰屋嘆曰天乎邑子取一第
如折枝而纍纍者綬耶吾窮經垂四十年無能
一當有司即功名不可為矣又胡遲遲吾後耶
句曲山有三茅君者最神東谷公為齋心修禱

祀者九年至某年母果有身而生大夫大夫少
敏慧特異東谷公撫之曰孺子誠劉家阿士也
遂棄去經生業日取盛唐諸子語咏之以自愉
快又善作偶儷句所著有東谷公吟稿及四景
對聯稿藏於家母幾病甚屬纊時則語母曰吾
幸晚舉孺子而才又不幸不得終孺子而父若
且代吾父之異日者成孺子名吾永永瞑矣母
哭東谷公數欲絕已又泣向大夫曰吾所不能
從而父地下遊以孺子也使孺子願息於業如

先君何乃課大夫讀日不足也而夕則篝燈爇
熒緝緝繞佐之其伊吾之聲達於丙夜矣乙卯
大夫舉於鄉凡五上春官而五北母曰孺子往
試於秋也未見難今試於春者五之豈盡左程
度耶殆命也夫且孺子必欲進士而始能報君
父乎吾八十又六矣不能待矣而何可使毛義
千古名也大夫遂以辛未謁選人授楚湘陰令
母謂民社任至重恐孺子少更事御板輿與俱
而日勉以廉平或至旁引鄉里宿德熒行風之

無幾而循良之譽大起湘中竟用治行高第遷
拜蜀合州守時母歸矣而大夫單車入蜀守故
得列五鼎烹日念母思所以迎而養之母曰吾
昔入楚以孺子筮仕也夫民一也既不難於湘
又何難於合且吾安能以九齡而間關九折坂
也惟孺子勉之大夫恭儉惠利除一切煩苛而
母亦時時寓書吳中所以訓大夫者非一大要
在省刑愛人而涪白之陽四民乂安年穀用登
熙熙然若納於康衢之間者幾三年如一日非

母之教乎母生弘治丙午十月廿三日至萬曆
戊寅十二月初五日不疾而逝享年九十有三
子一即大夫諱某見任奉訓大夫合州知州娶
裴氏孫男五某某孫女三某某曾孫男五某某
以某年月日柩東谷公之墓而塋焉余蓋嘗讀
漢書至雋京兆傳而深慨母德之利於人國也
不疑行縣錄囚徒還其母必問平反幾何乃上
食不則廢七箸而不疑良聲卒起三輔惟是惠
太母所以訓大夫者隨地稱仁視雋烈矣湘陰

身言金
余得之耳合州余得之目而諸父老子弟竊悲
太母曾不能再進天年以留大夫湏臾耳傷哉
傷哉又為之銘銘曰年九齡而與三乎厥壽也
殊帶三江而表五湖厥宅也都孝而姑相而夫
成而孤以逮爾子孫之呱呱為德於劉也五世
其楷模嗚呼大江之南而誰與俱

湖廣武昌縣儒學訓導少龍譚公墓誌銘
譚公既致武昌學官事余奉先淑人之諱日從
杖屨山水間爾汝甚驩也公時年望七十燈下

能作蠅頭書興到寫丹青小景余嘗欣艷公健
爽如少壯年且未央也已卯冬余起撫上谷公
觴於郊又時時賦詩郵筒相屬於道母何有言
公捐館者余拒其說又母何而公仲子弘澍奉
書上谷並檄公猶子弘湛所狀行畧乞誌銘且
其言曰孺子何敢請奉先子治命必欲得中丞
公言目乃瞑余聞而悲之遂為誌曰公諱思字
元通別號少龍先世河南光山人元末有諱榮
甫者徙銅梁東平里而家焉榮甫生福祖祖生

敬貴貴生錦舉成化癸卯鄉進士授衡府伴讀
進將仕郎錦生溥舉弘治庚戌進士授翰林院
檢討贈奉政大夫溥生紹宗舉正德庚午鄉進
士累官常德府同知以顯陵功進朝請大夫
加四品服俸娶張氏封宜人生三子伯畏季昇
公其仲子也始張宜人孕公時夢長庚入室是
夕生公公生而英偉穎慧異凡子能語時將仕
公口授古人詩輒成誦稍長就外傳治毛氏經
十二歲補邑博士弟子數獲雋餼縣官廩公不

喜經生常談好工古文詞國中俊秀慕公名而
北面稱弟子者若干人間則習詩歌臨池倣趙
文敏法公才敏給足跡所至題咏輒滿四壁乃
竟困有司庚午偕計吏上公車授武昌儒學訓
導公至擁皋比日鳴鐘鼓坐堂皇陳說經義諸
生以時考見德藝凡學宮之坊門祠宇圯者敝
者公削其常祿盡佐以新之時楚從事於史監
司廉公文學聘與諸鄉大夫名儒卒業至今楚
史為一方珎翰公之筆削也公任僅踰歲會長

墓誌銘
子死於家公遂投劾歸杜門不復與世事以翰
墨自娛諸造請者戶外屢常滿客至必羹飲食
款語古今事終日忘倦未嘗旁問生產一切權
子毋逐什一興土木則尤所不屑一日見祖基
踐於牧豎公告諸族不應為損資繚以垣旁以
屋高大王父故置祠堂某地並祭田若干畝歲
久齟齬於豪公為訟復之即馳驅伏暑中一無
幾微見於色族人咸相感愧其繼述天性類如
此公生正德庚午正月二十一日亥時卒於萬

曆庚辰十一月十四日辰時享年七十有一配
陳氏繼郭氏子孫男女某某卜今年二月十七
日葬於祖塋之後公有詩文若干卷藏於家嗟
乎譚公累世通顯有資藉而恭儉長者不為鮮
衣怒馬之習蕭然斗室中左圖右史有儒生所
不能及此其中必有勝人者當公傳經楚士時
其說詩解人願何異申培公轅固生也乃竟不
得從安車徵拜如漢所以尊二子者夫亦古今
人有遇不遇哉然余不以不遇為公慨者誌若

墓誌銘
銘在爾銘曰公豈不能為翩翩佳公子耶而儼
然常布之士公豈不能登虎觀備論思耶而僅
僅鄉校之師有涯也生無涯也知乃知天之獨
不忘多取者譚公維私

居來先生集卷之四十四終

居來先生集卷之四十五

銅梁張佳胤肖甫著

墓誌銘六首

陳孺人墓誌銘

陳孺人卒三十二年其子諸生聚奎自列狀請
曰母氏之見背也聚奎始四月云至今尚在淺
土未有銘也而若待於今日何幸生當先生乎
且也華衮與片言孰重願得先生文不則生不
及面死不及葬聚奎非人哉余聞其言而悲之

墓誌銘

居來先生集卷之四十五

子

孺人陳者余邑世家也先世山東人凡再徙而家邑之中正里數傳至价舉進士仕至都察院右副都御史孺人曾王父也价生揆舉進士仕至按察司副使孺人王父也揆生恬為邑諸生有名學者稱為小龍山先生孺人父也小龍山公生女四孺人為仲生即慧淑內則女誡諸書皆能舉其大義小龍山公又以經術文章冠冕西南然最奇孺人為偃蹇媒妁邑有東臯陳氏亦起家進士仕至代州守卒遺孤孫銳入稱蓉

池者幼英敏不群簡斥婦者屢矣封戶部郎冷公時遊小龍山公之門從容請曰先生之女淑若欲得快婿耶陳氏之子當之小龍山公曰亦知陳子材如禮何冷公曰先生故貫齊陳氏故貫楚豈若魯與吳去文昭武穆幾何而先生執以為嫌耶小龍山公猶俛首久之然竟不能舍材而令孺人不可托以終身因而委禽焉孺人既歸陳氏其姑盧者故侍御盧某女甚有母儀早孀與側室王形影相弔姑娶孺人則哭其夫

廟曰天乎不待而遺此孤未亾人所不能從地
下者以孤也今撫孤而有室且賢天乎有知耶
無知耶孺人益痛姑志所以孝養扶持者日薦
而事王如其姑是時蓉池君孤弱無所與門戶
事內外之侮齟齬日至門祚益衰孺人上奉二
姑下則效中山妻以勵其夫時先中丞南潒府
君以文學奔走四方之士孺人謀於姑遣蓉池
君稱弟子受毛詩經尋為邑諸生有聲孺人代
為家政力績紡分身耒耜間以佐膏楮蓉池君

得精舉子業以上慰母心孺人之德也嘉靖甲
辰姑盧病孺人晨昏侍湯藥求以身代竟不起
佐夫克致大諡至今邦人稱之最後代州公墓
地為里中豪蕪并將以售諸有力者時蓉池君
應有司試陳之男子若干人無有白見寃狀者
孺人聞之卽脫簪珥機絲以贄走鄉大夫舒公
泣曰惟妾代州祖非公之師乎而墓日削於豪
須臾不問化為他姓妾何敢望公築室於場獨
不念叔敖遺孤耶舒公大感動為居間反其侵

地孺人真丈夫哉戊申大疫至某月日孺人竟不免計孺人生在正德甲戌某月日年壽僅三十五爾生男四伯仲早殤聚東娶李氏卒聚奎生員娶胡氏女某孫男女某某嗟乎世孰無婦耶孺人者奉孀姑而稱孝相夫子而稱賢又能為陳氏把持門戶拮据萬狀以振厥家聲孺人故不但具婦德矣顧不待見子有成而聚奎者益痛母發奮讀書為時名士以繩祖武孺人有子哉余又記壬寅之歲親迎余室則孺人與蓉

池君實相禮焉至今余室誦說孺人莊敬純一之德不衰則余雅知孺人陳生之請有繇然矣銘曰吁嗟孺人為婦兮不識其舅有子兮不識其母三十五年而閱世兮壽也非久三十二年而始銘兮事也非偶庸詎知四月之呱呱者而竟能為孺人兮不朽

中憲大夫重慶府知府嵩陽劉公暨配胡孺人墓誌銘

某弱冠稱諸生時劉先生守重慶校一郡士拔

置高等至引與二子黃裳黃鼎游蓋驩然師弟子也先生歿五年而黃裳手狀徵余銘嗟夫狀所列盡矣而余安忍銘然余視先生猶父也又何能辭按狀先生諱某字汝素一字少質其先陶唐氏有劉累擾龍於夏代著融顯國初隸籍錦衣衛其徙汝光州自七世祖始曾祖忠贈太僕丞祖進太僕丞以子方伯公貴贈少卿以孝旌間生六子季曰廷佩為先生父做儻喜大節好施予娶鍾夫人生先生八歲師受伯兄

經毛詩通大義稍長讀史記汲鄭傳慕其為人為文做史氏伯兄見而驚曰必弟也與劉氏者年十六補郡弟子員郡倅張君奇先生材為具禮室胡孺人先生長皙電目高準修髯喜讀左國從橫家言擊劍通俠以自豪嘉靖辛卯領省解入京而滄陽王生引少年數十輩逆先生邯鄲校獵山下置酒亢歌振木燕趙慷慨之士聞之咸為感奮比至京都御史儀封王公語人曰今歲計偕士若蘇清左國璣與劉生可謂中原

三豪矣乙未成進士肄政戶部嘗晏至大司徒
梁公據案讓之先生為賦孤鶴上書求去梁公
更相推重而是時濟南李開先武進唐順之平
涼趙時春名傾一時乃無不下先生者以母鍾
夫人病告歸歸二年出授行人使韓事竣道出
武功時康修撰海家居逢先生縣界歎曰子非
汝南劉髯耶執手驩甚為置酒鞠域中康自起
撥琵琶先生搥鼓三摻作漁陽聲宮羽轉激四
座盡傾明年選給事戶科首上治河䟽陳四事

上可其奏 九廟災上封事具機祥洪範五
行休咎勸 上居法宮無勞神是時貴溪相用
事深忌先生益氣奮再伏 闕上書為樞言者
一正言者二愚言者三在攬權馭大臣令中官
毋得制兵而益開言路 上為動容會虜數入
雲中 詔舉邊材可當虜者而言官某阿相公
私所舉不稱 旨先生廷劾言官非是 上乃
讓二相謫言官罷不稱 旨者初貴溪相與侯
勛陰害而陽浮好謀共傾司馬王公公遂劾勛

姦賊竟下獄而夏緣是欲中王并罪之先生為
上書理其寃明日罷王歸夏恚甚然無可誰何
先生者乃遣客李寶以姑布之術說先生附已
當大顯先生怒髮豎粹胡投寶柱下明日揖夏
於朝曰某且死賊不能從客言他日從諸給舍
壽相公相公手玉碗行酒至先生前誦麗詞為
懽公色勃勃故墮碗客盡驚出明日疏夏十罪
謂夏顯權驕恣無人臣禮當坐死疏寢不報是
歲壬寅六月朔晝晦 上大恐問天官主何占

公復上封事曰臣謹按漢書劉向京房即顛皆
謂陰掩陽為臣迫君之象沴氣下盛上著於天
宜亟去言以塞天意明日遂逐夏一時臺省出
夏門者悉被黜因上邊事疏舉聶豹王儀可大
用而劾二撫臣選奕語侵銓部吉水毛公伯溫
讀疏吐舌曰真夫哉每過先生必論兵陳車法
先生曰此故噐書不可以兵夫虜血飲而蹶張
鳥舉而獸伏飄若風雨非得神勇士鞮鞞銜枚
絕塞斫營則燕然未易勒也毛公歎服是冬復

草疏欲及內事母鍾為絕漿相向泣先生乃已
因求使楚中奉母鍾歸明年癸卯改右給事刑
科未幾出守重慶蓋銓部報往疏也重慶在萬
山中稱巖郡先生携二子扁舟過黃陵廟祝曰
此神禹駕黃龍犁峽所也梁豫去數千里吾以
二子來而以墨反有如此江至卽貌野老幅巾
延問便苦獻歲行春必載牛酒勞農因止宿田
家召其子弟教歌詠彈琴焉夜市火先生拜之
滅夏旱身雩於社雨隨注至沒先生之腹父老

泣扶乃起是年大豐渝俗士人上巳咸汎江游
塗山先生亦間往諸父老具壺簞迎先生少飲
輒醉醉歌起萬人和融融洩洩至今想光景不
衰渝多奇士先生聚若干人使讀書塗山上丙
午蜀試士半出其中民有兄弟誦田者先生為
對泣曰豈吾不忍其兄而使民乃忍其弟哉民
皆叩頭流血相讓田去凡受爰書必平之法寧
失無苛郡以大治郡地通西南夷而播永土官
數爭地相讐戮直在播臺使者屬先生按其事

先生單車入赤水永女酋魁結苻馬陣諸山譟
兵澤中嘗先生賄弗為動諭以大義永不勒兵
播地遂歸渝江官舸費萬計而大司空采木亦
不下百萬計先生悉上奇羨不以私屬守令皆
莊事先生無敢睨視使者剡薦於朝為循吏第
一而值貴溪起相嗾鄉人給事南省者論罷先
生先生讀疏笑曰讐予之彈絃而踏鞠殆知予
者予乃今得從榮生帶索游矣然豈以重慶易
吾養也乃度北瀕涇淤園之幾十里名玄湖湖

種魚十萬頭隄樹萬章盡有蕪葭菱芡菰藕之
利洲上牧牛羊雞彘聚廬其中如農家又責僮
以鹽筴乘馬數以歲賦布易鹽構通馬者鬻善
馬他郡而實之邊因資以羸而身與數友馳快
馬射獵熊山下得禽以奉太夫人歡自撰歌曲
為綵衣銀鐙之舞以侑太夫人太夫人忘老為
加餐其穀入廛廛先公之遺而親族貧士資以
舉婚喪者半又稍通墨客無它羸已太夫人歿
而黃裳黃鼎舉於鄉而盡散山郎諸少年結草

閣湖中集徒數十人講經義撰易勺四卷春秋
管十二卷作通論四十篇著詩賦序記雜文二
十卷學者尊為嵩陽先生而不敢氏安陽郭相
嘗謂新鄭高相曰劉汝素富於著作必傳矣先
生之卒以隱仲子黃鼎而會歲癸酉預知死日
言白雞之年吾逝哉逝二年所而胡孺人亦卒
孺人性甚慧年甫七歲誦春秋孝經父西泉公
授以衛夫人書下筆精詣西泉公甚材孺人而
擇偶者無如先生遂歸劉姑鍾性嚴一鬻非孺

人操鼎卽不食雖祈寒盛暑孺人未嘗少懈也
先生給事省中每疏上人人危孺人前慰姑曰
給諫死忠新婦亦能死孝姑何憂自省中出守
至以讒罷孺人未嘗少感也其力儉不麥自其
天性然其撫二媵若娣姒字其子女若已出蓋
所謂媿賢儷行哉先生生弘治乙丑卒於萬曆
癸酉四月二十五日得壽六十有九孺人生正
德丙寅卒以萬曆乙亥十二月二日得壽七十
子三黃裳娶崔氏舉乙卯鄉試黃鼎娶汪氏再

嘉靖金 卷之五 十一
娶成氏舉甲子鄉試黃駿騰王出娶陳員外璋
女女一媵謝出適璋子九鼎孫三衍衍衢衍聘
鄉進士賈一敬女衍聘胡御史俊德女女孫三
適喻芳華聘賈之約羅璿張子曰嘉靖間夏相
貴勢熏灼天下幾侔人主矣先生以夕即言事
至今其惴不出聲捋虎鬚幾不免虎口巖哉乃
其出守罷守始終無少點流澤迄於今未闕其
非純氣是用可知已顧材雄不能受貧取譽於
俗夫筴既已不用之國而用之家即賜蠶何傷

於賢乎至晚節益茂以經術其所取精也多矣
又記乙亥冬某起家南鄉迂道走光黃起居孺
人至則孺人先一月卒某為文哭已躍馬南山
下作輓章展先生墓為之欷歔失聲信宿長公
子玄廬所然後去嗚呼先生位不酬才與孺人
教諸子伯仲竝舉於鄉以文章鳴世乃仲公賈
志蚤卒何哉先生之留餘以究厥施者是在子
玄以及諸子孫矣某往與汝寧趙良弼太宰私
論先生父子氣節文章類眉山而孺人則又類

墓言金
程太君良弼謂其知言也為之銘曰造化福取
不足曰惟先生之畜操婦則立壺極曰惟孺人
之德嗚呼天中之野淮康之汴玄室千秋二靈
妥是施其本支振振濟美其誰者銘巴蜀第
子

奉政大夫浙江嘉興府同知培東梁公墓

誌銘

梁公少不佞一歲童蒙時共學於李先生之門
不佞雖孩心已異之矣最後公之功名日起不

佞望公丰神岳立期以難老而今已矣二子構
拱列狀緘書紹介於武林願得不佞志之以遵
治命不佞即允烏能辭公諱某字用隆別號培
東世為邑之中正里人祖某生受受生志榮志
榮生禹贈大理評事世世受耕以薦行聞禹生
珠舉弘治己未進士授大理評事歷寺正大理
府知府廉正有幹濟不喜趨承忤部使者即拂
衣歸宦業具大理志中配羅氏贈孺人生四子
佐仁作儕繼王氏封孺人生什配程氏是為公

嘉靖金
父母生丈夫子三人仲杞季楷公其伯氏也當
嘉靖戊子太守公卒公之父甫弱冠不任家政
內外人齟齬之自是家道大替先人所遺田廬
漸蝕於豪公之父日撫公而泣曰所不與豪勝
者以兒也兒有貴骨當不忝爾祖以貽爾父憂
因遣就外傳與不佞從所謂李先生者稍長授
周易從從兄壽治博士家言輒試稱諸生猶非
也可數歲試不得稱諸生公悟曰吾柰何憑美
質芥視舉子業耶益發奮攻苦讀書復試又稱

諸生自此文日有名遂舉乙卯鄉試家道稍稍
振起抱祭器歸於宗廟奉父母及於高堂驅耒
耜還於場圃男女諸弟各有室家父又撫公而
喜曰無兒何以見爾祖地下哉辛酉父病公宵
衣侍卧起及卒而毀痛喪塋易戚稱之公凡四
上春官不第以戊辰謁選人授隆德教諭監司
一見奇其才即檄下署鳳翔鳳翔當孔道公倚
辦甚裕邑大饑賴公活者無筭尋遷潛江尹潛
江故沮洳地上腴多鬻於江豪右習為欺隱公

嘉言金 卷之四十五 十三
為堤之覈之至於平訟獄均田賦節浮冗興文
教修舉廢墮至今青天之謠洋洋江沔之上也
尋用治行高第知州沅州沅地瘠而雜有苗民
病於征歛散之四方公為徭徠又條上便民十
二事一一當疾苦衛所武吏視軍食為奇貨公
禁之毋敢肆治郡三年內安黎庶外伐戎心諸
使者相與謀薦公可當楚北鎖鑰乃以奏績同
知嘉興矣公既嘗試州縣無不犁然中窾矣即
職在海防一切兵食戰艦戈矛火器之屬稱繁

錯罔不振舉一署平湖再署桐鄉竝以廉幹馳
聲無何海塘潰一郡幾鹵司計者不成寢食且
捷石之工甚鉅石皆產於吳不易致監司廉公
也才請得公督治之公帥諸吏匠晝夜一編出
入震澤洶濤中如是者凡八閱月石完而塘賴
以治然公竟受濕病深矣臺使者䟽入得致仕
歸歸即臥一室理醫藥者逾年公彌留奉母程
太君泣曰兒不能送母終何以子為已又囑其
室劉曰吾目所不瞑庶幾能代吾養者汝與二

墓誌銘
孤耳言訖而逝先是公自題其像曰自無而有
自有而無茫茫太虛一真自如不佞不意公造
詣如此知道哉知道哉公生於嘉靖戊子閏十
月二十三日申時卒於萬曆辛巳八月三十日
辰時享年五十四歲配劉氏子二雲構娶蘇氏
雲拱娶朱氏俱生員有文才能世其業女某某
女孫三長許聘不佞姪孫其餘皆幼以其年月
日塋於祖塋之右司馬氏曰大夫之締造梁氏
可比於中興之業哉夫值家祚式微之運且當

戶且力學艱難備嘗卒能自致功名稱吳楚賢
令尹良大夫至奉尊人孝撫二弟友可謂人倫
之表矣不佞又聞尹潛江者必不利矣大夫則
利沅雜夷不可治矣大夫則治攜李繁劇多口
語難矣大夫則不難乃又勤事以死至今海塘
成蒸民乃粒伊誰之賜耶微大夫立見桑田而
滄海矣諺云樹穀一年樹德百年大夫功德樹
矣異日所以報大夫未竟之用者必在二子也
夫銘曰生而闡祖之幽光往躅芳來裔昌秦楚

於越以大播於循良歿而祔祖之玄堂佳氣長
永即康山川繚之鬱葱哉相望繫千萬歲我銘
是歲使人稱為賢大夫而問其姓曰梁

處士古愚李公暨配徐孺人合葬墓誌銘
祝進士某狀其外舅李公外姑徐孺人行畧屬
內兄諸生李邦禎者械幣上谷請余銘以余雅
知李公也按狀李公諱遇春字子端別號古愚
世為龍游著姓曾祖某生某某生大綱大綱生
公公生雙目如懸珠敏慧絕人稍長任節俠授

經治博士家言不售棄而醫專精東垣之學間
則習詩歌臨池得大小令法居嘗意不可一鄉
遂有四方之志抵姑蘇遇異僧目攝之且曰是
夫也行多長者游顧而目當以某月日瞽亟行
陰德可勿藥有喜公心恠之自是益兢兢自檢
去之大梁客朱灌甫家灌甫博文好士周室之
佳公子也與語大奇之留讀所藏書學日進時
督學使林某病革群醫相顧不敢藥灌甫屬公
一劑立愈毋幾微庶人母妃病聞公名延之亦

墓誌金 居來山房四十五卷 二百三十五載聘
一劑愈微庶人大悅將䟽 請公為府僚公知
庶人無道但飲輒佯醉罵坐遂得脫身大梁越
五年庶人事覺賜死國除自是公得此聲於梁
楚間人人爭交驩矣一日忽瞽如僧語公自治
尋復明人有問所行陰德事公但閉口金陵胡
憲副某遊梁時熟公名欲見之會公歸衢胡尋
督學兩浙召置與語問所欲居間公曰何以糞
土屈憲府三尺也問所欲上腴公曰薄田自供
饘粥何以八口相累也胡益重之為表其間曰

滄浪清隱云公交海內賢豪甚廣最善者興國
吳明卿明卿解叅政歸客皆去之公太息曰貧
富死生交態乃見吾願執鞭者其灌夫任安也
乎乃自家裹糧不遠數千里入楚視之至武昌
病作竟客死訃聞於家徐孺人哭亦死嗚呼痛
哉孺人故同邑滎陽丞奎女孺人少失母而繼
者齟齬萬狀孺人愈孝滎陽君賢之擇婿而得
李公孺人出富厚室歸李貧甚甘之若素上奉
宗廟舅姑下御䟽戚僕從慈敬之聲梱內外如

出一口邑俗嫡為政而難於妾即為後而妾者亦與婢鈞孺人甫三十不空男乃諷公妾公娶於陸孺人以女弟畜之衣食出入必與俱撫其子如已出逮下之德庶幾乎小星燕燕無乃天性然耶李公生嘉靖甲申三月十七日卒萬曆已卯十月二十六日享年五十有六孺人生嘉靖戊子正月十五日卒萬曆已卯十二月十五日享年五十有二妾陸氏男四某某出女一徐出適今進士祝某卜某年月日合葬於某山之

原嗚呼此據狀所志如此余識李山人蓋從吾友明卿所云明卿豪健不下人山人亦慙直鮮回曲少過輒面折明卿亦俛首聽公不能大飲顧好飲飲必浮白醉後耳熱以目光射人指掌談說天下事無所避時或箕踞脫帽齁齁如雷聲從鼻中起尤博古圖書不留囊中一錢有好之者即予之又嗜黃白之術以此益窘落不振余貶宛丘移蒲阪憲魏博撫江左山人必來來必彌月但願杯中不空無所預公事猶記已已

歲余從廣右叅藩入京山人手一編觀余曰此
吾里中祝生時義也吾有女而淑偃蹇其配者
數年之生也誠才而何至從歲起偕計哉余讀
其文甚奇乃拳山人背曰是佳士也不可失也
山人唯唯退竟以子妻之山人今歿而進士君
能狀其行微進士君則山人何所托不朽哉余
又不能無今昔之感也且聞諸孤貧不能塋為
捐俸十二金治墓又為之銘曰山人為友客死
江夏孺人為夫相從地下是義是節浮世斯寡

我銘千秋告諸來者

明封輔國將軍夫人史氏墓誌銘

按狀史夫人者蒲人史大公邦畿女也為輔國
將軍清菴公之妻夫人生於良族體性自然壺
彛攸備始輔國惟繼承之重慎簡厥配得夫人
夫人歸而婦順益章事其君姑周唯謹旦暮自
上食一味之甘必先之君姑而後御俾輔國以
孝聞輔國性嚴急夫人則濟以寬和戚里豪舉
夫人矯之以儉素衣取其縑者食取其菲者不

敢以游讌請也歲祿之入必以語輔國今坐而
廩於縣官者何唯是謹身節用以無負 恩澤
可爾至其斥奇羨以給嫺黨獨無厭色伯兄文
學喬科嘗卒業山中夫人筐篚之使屬而往也
而居常有所施予則必先宗人次君姑之外家
次諸史以為差其知大體類是自夫人母閭以
內煦煦然不為呵噍聲故既歿而媵有務面請
殉者矣丈夫子二人夫人教之造次必於儒者
夜既央猶儼然臨之常一夕課之學書赫號遽

盡夫人命裂布被以進繇是二子感奮益攻苦
於學俊權善書俊噤能為詩歌稱宗室之雋矣
教別室二子俊餘輩俱能問學有二女子夫人
亦必使之讀書明大節乃訓以女紅故女而能
婦其為裴氏婦者中女也歲乙卯夫死地震而
中女則死於夫非父母之教然耶然夫人竟以
中女死而神傷焉寢疾逾年遂卒卒之年為嘉
靖三十六年三月十九日距其生正德八年之
六月十四日也得年四十有五長子俊權娶王

墓言金
氏次俊噤娶惠氏二子封奉國將軍二氏俱封
淑人長女臨泉縣君選配范良憲次陵川縣君
即裴氏婦夫名禹卿者也孫男三二權出一噤
出孫女四一權出三噤出墓在大澗南塋以萬
曆四年十二月二十七日往予刺蒲締交奉國
則習夫人越十年而陳臬西臺則將舉夫人大
事常以墓中之石為請會予遷撫江南去去後
而奉國之請不已予何能辭銘曰恭定而降枝
葉肺附日大以蕃亦繇內助猗嗟夫人式秉陰
禮既敬既戒保有厥祉食而不盡以詒諸后彤
管之媿歿且不朽鬱鬱埋香蒲坂之側翟第過
者改容以式

雪菴昂禪師塔銘

余蚤歲頗耽幽尚蒞官三十載日溷塵勞解脫
不力攜李少司空陸五臺先生精詣名理與余
甚善壬午夏余以右司馬出撫兩浙有僧明禮
從雲間來因司空候見稱雪菴禪師弟子雪菴
余同里人也余方欲延而致之與究無生之業

墓言金
明禮至知雪菴示寂為婁其久之而明禮手出行實丐余立塔且為銘按禪師為余邑北門曾某子從母胎出聞腥葷輒嘔噦不休見神像必禮拜其父百嘗之無所好惟喜瞻佛寺中時年八歲其父捨入城西壽隆寺僧邀永祝髮為弟子法名昌昺又三年余侍南潞府君讀書寺僧邀趣方丈中趣即永師兄比屋而居是時禪師十一歲授內典於趣余十歲授經於先府君共坐一室中讀禪師善記記即了大旨每與余論

說而余多不解先府君特愛敬之又可數年發大勇猛辭其師自謂與雪峯禪師同姓且冥契其出世之符遂號雪菴云因往合州叅天峯禪師受無字公案日夕提撕誓必大悟乃已因杖筇履芒屨陟峨嵋山禮普賢大士獲覩身光逕裹香進步直越鳳山嶺求振宗和尚印證振宗者大覺禪師高足弟子也相見語合遂付偈囑蓋至是而居然有得矣下巫峽歷探名勝順流東邁抵雲間稍住錫於坐化菴中為宗伯陸平

泉先生所知欣然嘆相知之晚雲間城東北隅
有李唐北禪寺宋紹興間更名馬耆國初僧
慧海重建為雲間一大叢林嘉靖間倭夷亂鞠
為藁莽幾半無寺禪師來雲間學士大夫慕其
梵行脩潔多從之游為構一禪舍而度地之間
曠幽絕無逾馬耆也於是侍御宋定宇首倡一
時緇庶皈依者衆共建禪堂五楹大叅沉鳳峯
記之方伯莫中江太僕范中方給諫龔方川太
史陳恭巖時為禪悅之會稱極盛焉初禪師將

至馬耆忽飛鳥盡去俄頃有郡官命伐取殿前
銀杏宗伯以師故請於郡不得伐他日宗伯再
過見雙樹婆娑飛鳥咸集喜極賦詩有不改清
陰待我來之句聞者以為羨談先是余撫吳行
部雲間者再禪師竟匿迹不以聞大夫士亦鮮
知者後余抵金陵投劾將歸始從他僧知禪師
住雲間乃作書問止恙且重其善晦竝報其師
永公趣公相繼歿其徒不能守先業俱屬於豪
余捐貲贖而還之又於巴岳山中構赤松招隱

墓誌銘
居來山房四十五卷
二菴以待禪師與俱禪師但報謝無他語余歸
山中二載不復有用世意又日望禪師不歸無
何起家南鄉復寓書招禪師至天界靜談兩閱
月強之歸余亦擬拂衣去禪師但云此皮囊何
地不可遺公遇明時且未得歸恐老僧先歸而
公尚不及歸也語訖而陳太史諸公亦抵書云
幸勿奪我遠公其為諸大夫敬重如此未遑而
余領中山之命禪師亦返錫雲間余尋遭先
太淑人喪後起撫塞上復自上谷遺書冀申前

約禪師竟爾順世悲夫聞禪師示寂時其
禮朝夕侍默默無言一日忽索浴浴罷仍結
端然長逝嗟乎彼於生死齊一而追悟天界寺
中先歸之語始驗矣昔太原孚上座臨終無語
識者以為自得彌深而示人最切禪師近之哉
世壽五十八僧臘四十三沒後囊無長物藉宋
侍御之子民倩造龕諸士大夫擁送者不下數
千百人明禮奉靈骨瘞於禪堂之北迄今士大
夫崇奉護法無殊曩時而徐少師孫澤夫尤有

風義經紀禪師後事最力余念禪師為童子交
中年為方外友廼指俸授明禮造塔又為之銘
銘曰身自銅梁生骨自雲間瘞銅梁既非鄉雲
間亦非寓東西蜀與吳大地兩撮土生前葛藤
言為師大分別師今離幻緣常住無罣礙塔形
標蓮花聊示眾生意真宅在太虛非以此塔故
居來先生集卷之四十五

居來先生集卷之四十六

銅梁張佳胤肖甫著

墓誌銘五首

明故進階奉直大夫協正庶尹雲南騰越
州知州月山舒公墓誌銘

公諱芹字獻之別號月山為余邑貴州按察司
副使月川舒公第二子憲副公舉弘治乙丑進
士是年 敬皇帝焚香籲天宮中願得真材而
憲副公與張公伯相同舉竝賜二甲進士出身

墓誌銘
皆余邑中耆儒宿學云憲副公既善吏事尤善
訓子公在群從中質最稱穎書過目輒成誦憲
副公奇之既壯侍養西夏憲府中盡得觀古人
書與時王典故西夏冬寒甚以兩足沃湯中晝
夜伊吾不輟以此學益博暇則憲副公與談軍
國大政無不領畧志學之年為博士弟子下筆
閱肆滾滾乎若長江之蹈海王襄敏廷相張文
定邦奇先後督蜀學咸具知人鑑無不拔公異
等公之名日起舉嘉靖辛卯鄉試第十一八一

策該洽且廣其發問之所不及有司覽之吐舌
遂錄以式上春官者凡八俱不第以癸丑春謁
選其時分宜嚴公嵩柄國政進賢萬公鏜為冢
宰二公皆憲副公同年善厚友相謀以六曹幕
郎置公公念憲副公春秋高意得秩真大夫便
道省覲嚴乃語萬曰吾友舒國中蚤在田間良
苦滇有騰越者號饒奇誠得予舒子不但可籍
甘隴且得便道為壽乃授公騰越知州而公實
無意於茲土也公既領除目人咸謂瘴鄉萬里

而又稍悔前却內職居嘗鞅鞅歸謁拜憲副公
促治裝甚勵勉強之任公守騰越董董逾歲即
投劾上下人慰留之竟拂衣去公守騰雖未久
好以禮教變其俗他如釋冤抑清田賦却苞苴
鋤豪梗興廢墜繕橋梁撫夷酋種種皆鉅政暇
則群諸生橫經考藝至今龍江之上洋洋如也
公歸家盡出橐中裝以分二叔氏及伯氏之猶
子三族親疎各贍給有差無何憲副公病日夜
侍湯藥不少怠憲副公壽終公得親奉含歛廬

墓左者垂十年君子謂公擲大夫如弁髦庶幾
孝矣公明理薦倫寡合重然諾而尤急人之難
事兄癸如父癸操子母以貲雄里中苦之者相
率欲報之竟畏公不敢發訓弟蒞蘭如嚴師竝
領歲薦仕有官職先是公母楊安人以勤儉筭
奇贏脩息其業且至萬臨終僅予公七十金公
受而委之弟以佐大事餘則惟弟所取及母卒
一切治喪又公任之田宅計公得者什之二終
身無間言天性孝友固如此 穆考 今上登

墓誌銘
居來山房四十六卷
三
極詔天下致仕官賢者始得進階公以知州有
鄉誼得進奉直大夫協正庶尹鄉里榮之公博
雅文多奇字崛奧若盤詰語腹無墨汁者讀之
不能句詩歌止乎理義不欲為漢魏盛唐優孟
性峭急慷慨詞鋒颯發出入古今尤多彊記邑
中人細及幽隱大及言行即子與孫所不能言
者公亶亶道之文酒揮塵雅謔雜作四座聽者
無不絕倒公於書無不窺尤嗜春秋左國兩漢
游俠縱橫長短諸家之言故公之應事自得居

多然伉直不能容人之過人有得公意者忘分
通財至傾肝膽終不少假於負德之輩時或有
妄人侮之公又置之不校大要公深於消息經
權之旨不知公者以公如淵海而余則獨知公
之圓機自學問中來也先尚書南潁府君與公
友善竝建旗鼓不相下然亦交相重昔袁淑語
謝莊曰卿若無我當是江東之秀我若無卿亦
一時之傑當時以為知言二公其庶幾哉余齟
年以文字辱公倒屣公今歿矣誌其墓而銘之

墓誌銘
卷之四
四
余之任也况重以季公之請耶公生弘治己未
二月二十九日卒於萬曆戊寅四月初七日享
年八十歲娶譚氏繼鍾氏陳氏男子三長九齡
舉嘉靖丙午鄉試娶陶氏次九功早卒次九經
廩膳生員娶盧氏繼楊氏女一適廩膳生員張
英吉俱鍾出孫男二某某孫女五某某萬曆七
年十二月二十一日葬於大公石之原銘曰舒
肇明月如畏壘穰月流而川厥祖發祥月峙而
山厥宗熾昌繩前引後公澤孔厚丹府龍門漆

園蒙叟為行秘書為良太守玄武之陬太公之
丘天設真宅與造物游誌而銘之噫嘻千秋

明故文林郎湖廣湘鄉縣知縣南池吳公

墓誌銘

公大足人余同年友也令湘鄉卒於官歸墓可
六年其子諸生吳一瑞列狀率諸弟造余以誌
銘請屬余起家俱在行間未遑也今年始檢狀
作誌公諱鵬翼字子漸號東盤一號南池祖有
吳元者自英山徙大足之白土壩籍焉數傳生

永善永善生守道守道生漢濶娶鄔氏是為公
父母吳氏世力農供賦之外日與隣父作瓦盆
飲不復知有人間世若類於避秦之人者公生
及齠年王父使之牧又使之司田間偷公從隣
家乞書掛牛角讀已又乞筆墨拾瓦為研剪葉
學書不輟與村童戲則自立為長諸童聽其指
麾王父雖心異之僅知公異日可為田舍間祭
酒耳而公則不屑也日日泣請就外傳乃行束
修遍國中知名之士至其所從授尚書者則知

州鄔公桂枝也公既明經入為博士弟子文日
有名每試必傾多士舉嘉靖己酉鄉試赴春官
不第是為庚戌其年虜薄都城內江趙文肅公
為司業率諸生講禦虜策公出其門下大加器
重為手書大學首章貽之公歸課耕教子暇則
手一編饕殮之際董董兩菜羹以為常公好義
薦倫能為人緩急有古節俠之風叔祖吳高無
子沉死於河公善游急走水中尾其屍三晝夜
得之其屍敗不可近公負諸岸殮之歸祖遺田

三分族之豪者併其二以稅嫁於公人皆不平
嗾公訟願為之質公謂同氣之親不宐以口舌
爭竟不問遂寧人某甲子道經陳氏之邨陳氏
疑橐中裝撲之將死棄諸野公見而輿之歸為
延醫竟死乃解衣塋之隣有曾左二氏交怨各
畜病廝欲斃之以相傾公語二氏曰而欲洩私
忿如二僕無罪何即計行而殺無辜而無死所
矣其人聞而懼怨遂平公之善行非一其槩如
此公外和平而中實沉機有術數民間之疾苦

與公府之苛政公聞之必詣邦君言無所避以
此冒不韙幾為一魏簿者所中邑負郭皆上腴
豪有力者無不睥睨之或勢或賂竟不能得尺
寸公一以恩結之或居間其所欲逞或貸母錢
而不責其子或業售矣主有失所仍歸之而不
盡返其值至於擇人任時略倣計范之策以此
人爭售公田蓋公有道以致之矣公既八偕計
吏厭苦蜀道以萬曆辛未謁選授湖廣湘鄉縣
知縣湘鄉楚饒邑也而善逋負公一以廉謹自

墓誌銘
卷之四
勵邑相沿歲例千餘金悉罷除催科不事鞭箠
一諭之以理惟去其所以病催科者兩稅報如
期則自公始公善鈎距得獄情諸邑願質成者
甚衆而公未嘗純任三尺邑有盜魁彭廷憲招
納無賴窟宅苗箐而剽劫於洞庭之間垂二十
餘年莫敢誰何監司才公一以便空委之公曰
此盜不可以捕得者而陰結其黨陽示不疑竟
就縛事聞臺使者與諸司郡守甚偉之一時獎
檄交下如雨邑之士大夫張筵東臺為公壽公

善飲至五斗不亂是日亦盡驩忽語同僚曰興
盡可返語畢遂不能言亟輿歸衙齋不可藥次
日卒卒之日不能殮至典衣於市士民聞之如
喪考妣爭相為賻始得具衣棺成禮云公生嘉
靖癸未年某月某日卒於萬曆癸酉十一月某
日享年五十一歲娶袁氏繼譚氏教諭譚經元
女側室劉氏男五某某女一某孫男四某某孫
女三某某以某年月葬於城北天華山之陽嗚
呼余在諸生間即知公名無何同舉於鄉遂相

善夫以公之才與識而竟困於南宮至先帝
末年破資格用人公始授官治湘鄉未及暮而
良聲大起以公之雄心則千里一日何遠不屆
乃竟齎志曾不能究其什一悲哉公之子咸英
俊能世其業又聞某子舍殉夫大節甚烈采風
使者將聞之闕庭而旌之是天所以報公者
厚矣余聞公二十年前夢神人語曰公一生受
用東臺已又曰當遇吳鵬御史竟不可解及公
抵湘鄉見城中坊顏有東臺偉觀四字公忽悟

前夢私喜後登東臺扁有前巡按吳百鵬名蓋
吳故湘鄉令徵拜御史公益喜詎意成公識耶
東臺奇矣兩吳公姓名相近又奇數以尸之公
且柰何銘曰吳世家兮守蓬萊門有詩書自公
始生享令名歿稱良臣公之可盡者人東臺孤
騫姓字高懸公之不可逃者天人耶天耶付之
下泉我銘拈出公曰言然

中憲大夫江西建昌府知府少岷曾公墓

誌銘

武宗朝吾蜀數君子者起咸尚文章氣節而江陽少岷曾公其一也余為童子時聽學士長老誦說公名德如隔世人嘉靖丁巳走江陽為先府君乞墓銘於楊用脩先生始奉公几杖公亦接引後進談學術經濟灑灑有致公歿後二十八年而公之子某考功君持狀以誌銘請豈以余受公一日之知耶余客江陽時聞公父某以公貴受封遂稱封公其人個儻重義數急人之難嘗拾遺金於道必迂歸以伺亡金者授之

能詩文著有乾峯稿乾峯在合江縣去郡可二百里而遙縣西有安樂山千巖萬壑競秀爭流中為洞為臺為峯為盤為嶺為泉為峽為城為室即山經奇紀所不能臚列封公則樂之遂卜居終老而少岷公舉矣公生奇穎殊凡兒稍長即以聖賢正學自任七歲侍封公山陽茅屋見隙光曰此何故哉其野馬丈虹耶封公異而詰之兒能對乎明透屋山光似玉公應聲曰影浮書案氣如龍封公益奇之十四歲補博士弟子

嘉靖金
卷之六
九

每試輒高等郡侯為築別業於鳳儀山以居之
公益肆力於古今之學尤精書法得帖意時威
茂兵憲王某者聞公名欲召置西塾督學蘇某
曰曾生非可檄往也空禮聘之公應聘往因登
大岷青城諸山西眺渝氏東眺汶瀆胸中吞其
八九而嘆曰大岷之外可稱配林孰與吾家安
樂日相從几席間也遂易安樂為少岷山因自
號云正德丁卯舉省試第五人明年成進士授
戶部江西司主事時逆瑾為政縉紳趨者如市

公不惟無所投刺間有言觸之會瑾執不附已
者跪午門外而公幾不免尋權稅清源以廉明
稱後轉員外郎中條上大司徒八事曰革皇庄
裁冗費禁濫支減廐馬清鹽法停鈔法明徵納
禁使用蠲門稅重漕政大司徒稱善而卒不能
行其言丙子知府建昌公益循循良以臻良二
千石共理之效上劑益藩下悉民隱立社學建
書院群弟子而考德問業盱水之上洋洋如也
郡有兩芙蓉山多淫祠妖術橫行公廉得其首

付諸理毀淫祠以祀伍大夫李盱江岳武穆郡俗遂變其他發閩人王政胡添三詐偽正豪民梁敷十九殺人罪暴妖術連世勲父子屍伸雪良民羅增寬抑然皆非公之大者惟是寧庶人謀不軌要脅諸司莫敢不為壽以求免公自持如常會省城變起公遣健卒間道走上變又自帥兵兼程詣軍門陳擒勦七策王文成采之合兵火攻又慮九江南康業已從逆不分道擊之則楚援兵為梗文成檄公取南康斬賊首謝天

一等四百八十餘級又自王家渡同廣信守周朝佐斬獲賊三百三十餘級釋脅從者八十五人寧庶人遂擒當公勤王時與母鄧恭人永訣誓與賊不共天卒能成社稷功王文成亦敘公勞烈而竟不錄先是寧庶人膏腴苑園屋廬多為豪所侵中丞鄭某者檄公一無所徇盡返之盱郡有巨室欲齧齧麻姑山公裁以法又上叛逆疏內有省內奸邪顯附陰附語繇此忌與怨交集咸為蜚語中公不免矣然盱人至今尸

而祝之益信天理人心未泯如此公以庚辰垂
橐歸移居江陽郡城購茅齋數楹藏書數萬卷
日坐其中手一編以著述自快中丞劉公大謨
御史金公深交薦公可大用不起著有聖學會
通河圖洛書解春王正月考歷代史評論心學
論樂律論數學論氣化皆發自契悟無所勦襲
其要歸於中正精實有宋儒所不能道者歲旱
課耕苾里靜觀雨暘之故雩禱之節又著名和
錄不泥不鑿深於天人之際修川東志精核有

體為一方良翰為文高峻曾達一本六經行乎
意之所止而不沾沾蹈古人語所與交者如王
伯安何仲默鄭繼之呂仲木皆當世偉人也楊
用脩白首成滇欲歸蜀為首丘計乃不歸新都
而卜宅江陽以就公相與賡酬甚盛然公意在
經學思成一家言以詔來者其於題詠劄記則
隨意小赫蹠成草草畢亦隨散逸今存者皆諸
子私錄特百之一二耳故名拾存篇云公貌脩
峻而癯骨立健爽即屋漏無惰容平生目不識

權量手不持金玉耳不喜絲竹布褐蔬食常晏
如也曾經池陽夜夢青衣童子入舟曰余九子
神也九華則爾鄉李白所易重錫余以嘉名意
良厚故不樂也子為余復故號公覺作青陽九
子歌公敦朴無華感孚山靈非偶然者與人真
誠直易無他腸具知人鑒料事多中然善惡界
嚴嘗面斥人過不少避而宗族賴以衣食婚葬
者甚衆常祿外及先世所遺者分授猶子士謀
士交士傳輩家有塾課子弟不效經生常語故

江陽稱曾氏子弟優者為龍劣者亦不失為虎
矣一日病革將易篋啓手足謂諸子曰平生無
他恨第著述多未脫稿紹明予志是在爾曹言
訖而瞑公守建昌有祠居鄉為月旦所重其鄉
之人與弟子私謚公文節先生又祀於社公蒙
詬而屈抑林下者幾四十餘年以考功君令甌
寧時上最考循良高第請復公職取 俞旨亦
異數云公諱某字東石生成化庚子三月三日
卒於嘉靖戊午十一月二十九日享年八十歲

上世有祖諱長一自江西徙河南再徙麻城入蜀家於江陽為河西公是為蜀之始祖河西公有隱德不顯歷四傳生思虎思虎生海寬是為公父以公貴封戶部主事配員氏封安人公配鄧氏封安人加恭人繼配郭氏張氏宋氏封太孺人毛氏生子六士弘舉嘉靖壬子鄉試授洧川知縣士宗士林俱郡學生士登丁丑進士士彥甲戌進士考功司主事士科舉丙子鄉試孫男某某曾孫某某以某年月日塋於某山嗚呼

此據狀而誌公者如此余為諸生時余邑先達有都運童養之先生蓋鄉之樸茂長者其父諱琦仕為瑞州通判正值寧庶人變起通判公亦嘗督師擒賊以功陞四品秩都運公嘗語余言江西討賊之役有幸而功者有功而不幸者幸而功者難言之若功而不幸者吾鄉曾公是也都運公侍父任得於耳目者真且都運公平生寡言言必有中余聞而咨嗟久之夫公豈惟功不錄竝其所固有者而奪之何以勸忠余謁公

時曾述此言以質公公笑而不荅嗚呼可以知公矣又為之銘曰嗚呼公出而稱社稷臣者為年僅一十有三幾不免於二逆之航航公處而稱鄉先生者為年則三十有九庶幾乎兼太上之三不朽忌功在人公何所嗔篤公在天公亦超然六子而高第者四未量者二天若有意以報公志人限公以有涯公獨遊於無涯即小子能銘功德而於公乎何加

文林郎直隸高陽縣知縣鎖山劉先生墓

誌銘

某為諸生時邑侯麻城鎖山劉先生每試某必高等深加歎賞召至齋閣中與其子守泰守益課經義未已也又為游揚諸侯間於是川以東知有某名嘉靖己酉春督學試稍後邑中忌者相與目攝先生不知人先生聞而笑曰大比期且莫矣何可以口舌爭使邑之士而無所舉乎則已舉則誰有先張生者是秋果舉於鄉明年成進士邑之人始稱服先生先生歿仲子守益

列狀走檀州以誌銘請且曰先志也某出先生
之門即不文安得辭按狀先生諱瀾字汝觀別
號鎖山劉自唐有汾者兵部尚書家於麻城傳
至宋雄輝者亦兵部尚書某郡開國公食邑若
千戶又十數傳至夢祖是為國朝劉氏之始
祖也以從征有功授漳州府同知再傳生仲輦
封某官生三子長天和仕至太子太保兵部尚
書謚莊襄見名臣傳季某仕至某官天民則中
子也是為先生父仕至唐府教授先生生而

有異質七歲即強記舉履如大人長者莊襄公
奇之目為劉家阿士十五歲補博士弟子明春
秋博綜百氏窮研理窟日下帷讀伊吾之聲徹
於丙夜下筆數千書立就麻城故多才成不敢
與先生當旗鼓嘉靖乙酉督學使者田某於省
城建濂溪書院群楚之名士而遊息之先生首
被選拔巡撫中丞某者以私銜督學欲罷之一
日相謁客名驟至書院藉諸生名鮮佚遊者
無所發難則面命講太極圖義諸生相視不敢

對先生雍容就經席纚纚陳說名理出蒼天入
於無倫折衷朱陸同異多前賢之所未發中丞
乃改容而聽為之流汗自此不復言罷書院矣
已亥隴西胡公纘宗巡撫河南胡夙有文才名
慕先生為敦延大梁命其子北面事先生胡公
則日與先生談古今之學先生文日上又不但
工博士家言矣庚子以春秋魁楚辛丑上春官
不第遊南雍出張文毅公之門凡所程試與登
覽諸作一出而傾江左之士過毘陵白尚寶悅

吳某官某與其子吳翰林可行聞先生名相與
談統咸歎服以為不及丁未又下第教授公貽
先生書大要謂父母春秋高古人樹不朽者何
必減進士不見楚霸王飛將軍卒不得王與侯
豈遂不稱英雄耶子休矣先生持父書低回泣
下數日然竟不敢違父命遂謁選授銅梁知縣
先生歸肅衣冠上二尊人壽甚喜竝請所以牧
民者叱馭入蜀邑故熟先生名先生露冕入城
父老子弟羅拜驩呼謂得先生晚先生政尚體

要事不煩苛務以禮教拊循其民有訟者以片
言立決之各頓首得意去邑故多逋賦先生曰
負賦豈盡民耶扶之無益為置牒牒署族長某
族衆某某各田賦若干以牒付族長督率如期
人人得自灌輸禁隸卒不得入鄉閭由是乾沒
少而賦無敢負者朔望謁先師畢則群諸生橫
經問業諸生各更端請質每至日晏不能去邑
有盜魁朱弘仁善賂官府左右人凡官有所欲
誅捕左右人潛通之剽劫四十餘年遠近苦之

莫敢誰何先生廉得左右主名首付之理知典
史周堯平有心計命董其事又廉得鄉保長王
貴重武勇任俠為弘仁所結納先生審進而語
曰我故知弘仁所嚴事者汝也汝欲富柰何愛
賊賊貽後患孰若為官府除賊立受上賞且為
名高也貴重頓首請死執所佩劍曰所不為我
侯効力者有如此劍乃私與典史畫策遂縛弘
仁賊黨咸反側不自安先生諭之曰汝輩初不
幸而從賊卒不能舍賊者以賂官府得計耳官

府捕不已汝輩賂亦不已雖欲自新何繇耶今渠魁禽矣脇從者咸宥之許歸農賊黨謝曰明公天人也從此願變姓名力田至今冒王姓稱良民云先生政多類此時分宜倖相內親易某者同知重慶署郡事當入計遺心腹要挾先生重賄先生醜之易遂署先生下考調高陽高陽彈丸地也又何難先生僅以願指之而事立辦邑多巨璫好以非理撓先生法先生無所聽巨璫皆怨畿郡司理自負為直指耳目好尊大故

事邑大夫事他郡司理如直指使者先生無所絀諸司理銜之合為蜚語謀中先生時鄉人馮公天馭張公居正竝列華要咸寓書欲為先生居間先生歎曰銅梁巖邑也能得民而卒不能獲上高陽視銅梁易易者牴牾乃爾今年踰五十位不滿六百石頭顱可知乃為書謝二公竟拂衣歸歸痛父不逮養而養母至孝暇則與里中長者結社話桑麻酒酣則詠彭澤青蓮詩以見志為文取裁左氏而氣格雄壯隨意命筆多

墓誌銘
不存稿長公守泰拾其遺而梓諸江陰者財什
一耳先生生弘治乙丑卒於嘉靖己未得年五
十有五配鄒氏為邑中丞鄒公某孫女先先生
四年卒子二守泰舉湖廣甲子省試第一人辛
未進士授江陰知縣以循良高第徵授吏部考
功司主事娶王氏守益生員娶熊氏孫男三承
祖生員娶周氏承美生員聘某氏承祥聘某氏
孫女五某某以某年月日葬於塞基山之陽守
益又言曰先考歿而里中薦紳何不可誌而銘

也墓十七年而宰木且拱矣必以待公者念先
考有惠政於銅梁守益方在齠稚無所知又不
幸伯兄相繼歿遂無能為先考明其事知公念
先考必能習其遺敢以累公某覽狀誠寂寥乃
追昔所睹記者舉其略然又嘗宦遊三輔稍稍
知高陽治狀今所舉者亦多遺猶愈於盡遺也
某素耻為諛墓辭茲所誌者蕪陋誠有之諛則
不敢又為之銘曰天道無親常與善人謂斯言
是耶胡先生竟困公卓更兩邑而遭屯非耶胡

先生元魁濟美空子孫而振振噫嘻天不驟示
以福而永厚厥施江漢不竭蔡衡不移於先生
乎何疑敬勒茲銘于以俟之

迪功即湖廣益陽主簿惠泉向公墓誌銘
此余內兄向公志也公歿之三年是為丁亥余
適請老在里其弟家率公之子明星持公弟
完行狀請余銘乃攄狀志之曰公諱寀字子恭
別號惠泉先世本楚麻城人有祖仁可授銅梁
學訓導遂占籍塔子里家焉生志高高生學浙

江龍泉教諭配張氏生忠以上壽奉 詔賜爵
一級配張氏生東陽娶胡氏仕為山東荏山驛
丞生公公生而敏給有機變長習舉子不成棄
而明農任俠裘馬翩翩如佳公子也嘉靖辛丑
入貲承差善中上人意指隆慶己巳謁選授湖
廣醴陵縣典史其邑北界湖湘東連吳楚亡命
大俠阻山負湖剽劫郡縣民不安寢食者數十
年矣公自少橫槊擊球工騎射率力士若干人
躬冒矢石直探其巢擒盜魁王庭武數十人竝

其餘黨付諸理咸磔於市一方四民夜戶可啓
而誦公之能臺院監司相與交獎政聲大著陞
益陽縣主簿感疾疾致仕歸居家篤厚宗族業
農課子置立義倉以周貧乏內外之親待公舉
火者甚多而公驩然自得也當公父之歿也遺
兩幼弟家密其時析箸既久各有成業獨兩弟
箠箠在疚立錐無地公父易簣時傷慨良深公
先意承志誓以已業與二弟鈞公父大領之而
目遂瞑二弟漸長教養之家室之割田宅相讓

無幾微難色兩弟成立若不知失怙也者所謂
孝弟君子非耶公生嘉靖壬午十一月二十四
日子時卒於萬曆乙酉二月廿二日卯時享年
六十有四公先娶陳氏邑憲副陳揆孫女早卒
繼娶巴縣郭氏生員郭朝安女公同胞三人長
姊適巴縣傅先賜妹適余累封一品夫人弟三
人察娶嚴氏庶母徐氏出家娶蘇氏郡生員蘇
奇女密娶安氏郡生員安定女俱庶母黃氏出
男二長明星娶張氏邑生員張杰女次長星聘

嘉言金
居來先生集卷之四十六
郡生員劉練女卜某年月日葬於祖塋之側又
為之銘銘曰公之少也鮮衣怒馬豪舉一時
人出胯下公之仕也探丸赤白刁斗不鳴盜賊
歛跡公之歸也克承父志割肥讓宮乳哺二弟
任俠盡倫庶幾稱人生有餘韻歿有令名誌而
銘之萬古崢嶸

居來先生集卷之四十六

